

四庫全書

史部

欽定四庫全書

史部

湖廣通志卷四十七

詳校官監察御史_臣陳化龍

檢討_臣德生覆勘

總校官知縣_臣繆琪

校對官助教_臣羅萬選

謄錄監生_臣李觀光

欽定四庫全書

湖廣通志卷四十七

鄉賢志

古者論士必於鄉而士大夫之賢者皆得祀於其鄉惟鄉黨有定論斯國史亦從而採輯焉滔滔江汉南國之紀若尹內史之文武為憲孟吉公之忠孝雙美著名經史尚矣至於經國型方勤學敦行或出或處皆名教之樂地人倫之標準也

本朝釐定祀典各省鄉賢皆奉

旨下禮部覈品行而定去留法綦嚴矣榮亦有加焉鄉
之後進瞻俎豆而企風徽獨無卓然興起以繼前
賢之芳躅者乎

武昌府

三國孟宗

詳孝子志

唐李邕郡縣志字太和其先江都人父善徙居鄂州
之永安唐書列傳邕少詣李嶠願一見祕書嶠薦之

假直祕閣未幾辭去嶠問以奧篇祕帙對辨如響拜
左拾遺會宋璟奏張昌宗有不遜語請付法則天不
應邕進曰宋璟志安社稷非為身謀望陛下可其奏
則天色解明皇時為陳州刺史張說忌之以事下獄
許州人孔璋上書救之減死謫貶遵化縣尉後從中
官楊思勗討賊有功歷括淄滑三州刺史上計京師
阡陌聚觀以為古人天寶初歷汲郡北海太守李林
甫因事矯殺之年七十餘邕早擅才名雖謫外中朝

衣冠天下寺觀多齋金帛往求其文有集七十卷後
贈祕書監

李鄴唐書列傳字建侯邕從孫第進士為李懷光所
辟歷監察御史懷光叛鄴陷賊中密與高郢刺賊虛
實及所以攻取者白諸朝事泄懷光詰責鄴詞氣不
撓三軍感動懷光囚之河中賊平入為吏部員外郎
徐州張建封卒兵亂囚監軍迫建封子愔主軍務帝
以鄴剛敢拜宣慰使持節直入其軍諭以禍福出監

軍獄中復其位衆不敢動愔上表謝罪還稱旨遷郎
中憲宗立為京兆尹累官刑部尚書後為淮南節度
使諷諸道輸貨助軍由是悉獻吐突承璀薦之召拜
同中書門下平章事鄜不喜由宦倖進以太子少傅
致仕卒諡曰簡

廖忠

詳忠臣志

五代吳仲舉

詳忠臣志

宋吳中復宋史列傳字仲庶進士及第知峨嵋廢淫

祠代還不載一物通判潭州時御史中丞孫抃初未
相識薦殿中侍御史或以問抃曰昔人恥呈身御史
今豈有識面臺官也中復益勵風節劾宰執梁適劉
沆仁宗飛白書鐵御史三字賜之進龍圖直學士知
江寧郵兵鞭巡轄官中復以便宜戮首惡流其餘又
歷成都府永興軍拒行青苗法後關內大旱請賑恤
流亡執政惡之謂為不實削一階起知荊州坐過用
公使酒免卒年六十八中復樂易簡約好周人急士

大夫稱之從孫擇仁

馮京宋史列傳字當世江夏人少雋邁不羣鄉舉禮部廷試皆第一時尚未娶張堯佐欲妻以女京力辭出判荆南府事還修起居注時吳充以論溫成皇后追冊事黜知高郵京疏稱不當黜劉沆請並斥京仁宗曰京何罪但解其起居注旋復試知制誥避婦翁富弼當國嫌拜龍圖閣待制知揚州改江寧府以翰林侍讀學士召還糾理刑獄知開封數月不詣丞相

府韓琦疑京傲語弼弼使往見京曰公為宰相從官
不妄造請乃為公重非傲也出撫陝西請城古渭通
西羌响氏界木征官以斷夏人右臂除端明殿學士
改御史中丞王安石方議新法更張制度京論之安
石指為邪說請加黜逐帝不聽擢樞密副使進叅知
政事數與王安石辨論保甲養馬不可行又薦劉攽
蘇軾掌外制會選人鄭俠上書言時政謂京可相呂
惠卿譖京朋黨罷知亳州尋以資政殿學士出知渭

州值茂州叛徙知成都府蕃部何丹方寇雞棕關聞
京至詣降議者欲搗其巢穴京請於朝禁侵掠給稼
器糗糧遣之歸蕃部皆喜受盟願世為外藩復召知
樞密院京以疾未至帝遲其來至形之夢因有夢寐
不忘之詔隨以觀文殿學士知河陽哲宗立拜保寧
軍節度使知大名府改彰德范祖禹論京生平先後
為安石惠卿所傾沮中立不倚且昭陵學士惟京在
付以樞密必允公論時京已老乃以中太乙宮使兼

侍講改宣徽南院使拜太子少師致仕卒年七十四
帝臨奠於第謚文簡所著文集奏議三十卷

費師古楚紀蒲圻人天聖二年登宋郊榜進士英敏
有才尤長賦咏官至諫議大夫時知諫院范鎮以請
建皇儲罷職師古抗疏留之不報遂致仕而歸著有
疊秀亭詩草

吳擇仁宋史吳中復傳擇仁字智夫興國人以父任
為雍邱主簿因河決得議事朝堂宰相范純仁異之

曰簿領中乃有是人耶曾畿內饑多盜選知太康以
靜鎮為政盜不入境按治中貴譚正奴犯法正譖之
徽宗遣宋喬年往鞠不能得擇仁毫毛罪喬年歸薦
之擢西河路轉運使判官從招討使王厚伐青唐有
功進集賢殿修撰為京畿都轉運使知開封治宦官
楊戩匿賣珠人戩中以事出知熙州終徽猷閣直學
士知渭州

陳倬

詳義士志

陳求道

詳忠臣志

任獻夫

詳文苑志

盛子充明一統志興國人登崇寧進士親喪廬墓鄉里稱孝多藏書置萬卷閣初與王黼同舍黼登相位一無所求仕為朝奉郎

李義山姓譜字伯高嘉魚人讀書一過能解大義師事朱仲晦張敬夫嘉定中第進士累官金部郎中時稱其行美如瑜節介如石又序其詩為渡江後一大家

吳必大字伯豐明一統志興國人以父任為吉水丞
屬權臣指朱子為偽學遂棄官歸早師張栻呂祖謙
晚師仲晦深究理學議論守正為儒林所重

馮洽

詳文苑志

邵應豹字起南其先淳安人父遊武昌生應豹家焉
明一統志豹舉嘉熙二年進士為常德司戶歷知江
夏寶應潯州皆有惠政府志豹以母老辭祿侍養時
丁賈二相皆與同年當路薰灼豹獨絕之幼篤孝母

疾醫須鵲肉和藥豹默禱鵲自投於庭母遂愈其後
居喪哀毀成疾再祥不禪及老杜門謝客吟咏自適
其出處進退皆能守禮度義卒年九十五爵淳安縣
男食邑三百戶

元何槐孫字德字蒲圻人幼穎慧日記數千言泰定
四年成進士初授宜黃尹洞燭民隱人不敢欺值歲
饑勸賑有方再推德安雲夢俱著政聲至正二年遷
慶元路總管府推官申條約決疑獄未嘗以聲色加

人而委曲得情闔郡畏服著有善政指南書及碑碣

諸文行世

舊通志

李英楚紀嘉魚人元末保障鄉閭從叅政阿魯輝復武昌有功授校尉甲午秋蕲黃祝寇以舟師溯武昌英伏兵江中擊賊溺死者無數授黃州府同知以疾辭不赴

明劉任明一統志武昌縣人元四川行省叅政洪武初召為兵部尚書後出為廣東行省叅政以善政聞

東莞伯何真降附任處之得宜召為應天府尹

曾泰楚紀江夏人洪武初以秀才徵上重其學行每慷慨論事言無不從超拜戶部尚書

蔡哲分省人物考字思賢武昌縣人洪武初任右司郎中奉命詣贛州招諭熊天瑞遂遣子入朝又命往蜀報夏明昇聘挾畫師同往圖其山川險要因言昇可伐卒用其策進叅政復召為御史以所舉御史某犯法被劾免官及卒上深惜之

劉維楚紀咸寧人洪武初徵詣金陵諸司營構咸資
草創授工部尚書

周縉分省人物考字伯紳武昌縣人洪武初授永清
典史攝縣事以廉幹稱靖難兵起守令相率迎降縉
極力拒守兵寡不能敵懷印而南道聞繼母喪歸終
喪糾義旅勤王聞事定匿民間後械至京下獄謫戍
興州以子代得還

周璵縉長子縉謫戍興州璵為家督撫諸弟極友愛

鄉黨宗族無間以子源貴贈監察御史

舊通志

魏觀分省人物考字杞山蒲圻人國初被徵與劉基
宋濂同謁上與語奇之授平江州學正歷遷兩淮都
轉運入為起居注洪武初命侍太子說書大本堂及
授諸王經三年轉太常卿改定諸祀典稱旨集大明
志成進國子祭酒四年廷試進士觀與孫吾王僎為
讀卷官得吳伯宗等一百二十人坐考祀孔子禮不
以時奏謫知龍南縣未至即召還為禮部主事廷臣

薦觀有治才出知蘇州府懲苛政敬老恤民建學宮
舉鄉飲禮聘名士風教勃興擢四川行省叅知政事
父老疏留命還郡以修府署浚河事御史張度誣奏
之與高啟等並坐死上尋悔之命所過致祭皇太子
諸王哀賻有加乃歸瘞賜祭葬

王允茂分省人物考字才英蒲圻人嗜學通經與兄
志學相友愛洪武十八年舉明經授泰寧令釐革弊
政民情翕然太祖錫丹符以旌之卒於官

宋忠楚紀字德敬崇陽人洪武初令清流興學剔弊有羣盜嘯聚忠抵其巢撫之俱降立巡檢以管束之遷刑部員外清流士民請於朝擢汀州知府

成務楚紀字惟幾興國人洪武丙子舉人授廣元諭適御史按邑率諸生郊迎望見行李繁重遽麾諸生返御史至問生員何在對曰行李甚盛恐壞士子心術御史竒之以敢言薦擢行人使暹羅改御史永樂間設貴州省上顧見務英偉曰黑御史可任按察使

務往振揚風紀貴人以鐵面稱之歷官二十五年未嘗攜家

范俊分省人物考大冶人洪武間以貢拜監察御史歷陞左僉都御史以風裁見稱權貴避之

劉仲廉楚紀江夏人洪武乙丑進士淳質有守永樂初營建北京多效勞績陟工部侍郎轉尚書

鄧真分省人物考字存誠江夏人永樂辛卯進士授監察御史上疏言時務十事擢山東臬司讞獄詳明

政事通敏轉布政使愛民如子卒於官士民像祀之
王愷分省人物考字時舉允茂子永樂甲申進士知
江寧諸務煩劇處之裕如命撫畿甸逋氓旋集上問
戶部錢穀出納面對不爽進左中允時漢庶人構陷
宮僚下獄愷誦讀不輟宣德初補廣西僉事猺獞為
亂遣文武將臣同愷往撫底平賜遊後苑觀元宵燈
愷疏陳六事特賜俞允征大藤峽襄翊有功至潯州
建學校荒徼向化轉廣東左叅議往撫欽廉叛寇事

平刻石招遠山

陳智分省人物考字孟機咸寧人永樂丙戌進士授
監察御史按閩斷書生張疑獄按南畿捕奸黨數十
置於法擢陝西按察使剪猾理滯囹圄為空洪熙初
入覲兵部奏以馬給朝覲官歲納一駒智上疏謂職
官牧民而令為戶部孥馬失朝廷禮下體非新政所
宜仁宗嘉納之父喪廬墓服闋乃泣陝陝饑連有大
役皆止之宣德中進江西右布政永豐張子良亂智

戮其首餘黨皆宥免正統初進都御史數平反大獄
御史張勗訊囚失實智筈之勗遂誣以他事落職歸
楊昂楚紀字文昭崇陽人永樂壬辰進士授監察御
史守制起補貧至不能趨朝後為山東道是時法尚
嚴奏免坐死者三百人性耿介彈劾不避權貴宣德
四年出為浙江僉事賊據百丈山蘆弄洞頻出金衢
剽掠昂亟攻之圍其山賊首自經餘皆散七年考滿
以疾辭歸正統二年少傅楊士奇少保楊溥薦昂可

大用及引見上嫌其鄉語補廣東按察使士奇曰何
為猶土音耶曷曰世楚人奈何效齊語媚時居廣東
三年致仕歸年八十六卒

龔伯寧字文卿明一統志崇陽人永樂甲辰進士知
新昌公明廉介鋤強息訟勸課農桑鑿天寶山引水
灌田甚廣入覲卒於都

王竑字公度江夏人正統己未進士授戶部給事景
帝監國廷臣伏闕劾中官王振罪錦衣指揮馬順叱

衆令起竝奮臂捽順髮齒其肉百官爭捶順死直聲
大振旋因邊警擢僉都御史督守居庸諸關事平巡
撫淮揚兼總督漕運官弁畏服歲大饑盡心賑救全
活者百八十萬人英宗復辟石亨論其擊順事罷為
民天順四年復起原職征平涼寇平歷官兵部尚書
致仕卒謚莊毅賜祭葬

明史稿

辛浩分省人物考字養正江夏人正統戊戌進士任
監察御史彈劾不畏權勢謫戍遼陽乃選教將校子

弟皆有成天順中復其官

盧中楚紀字守正蒲圻人父貴賢性嚴中奉命惟謹
正統十年成進士歷員外郎中居布衣蔬食遇權璫
貴戚屹然弗少遜門無私謁用法不撓父嘗鞭之甘
受焉及叅議浙江歸守父訓蕭然無一物人盡稱其
廉樸而父名益彰云

李田分省人物考字舜耕嘉魚人景泰甲戌進士歷
戶部郎中成化初督餉征蜀有功擢廣東左叅議海

南夷叛抵穴懇諭夷皆効順進左叅議辦綵幣墨印之弊累遷副都御史巡撫京畿歲饑發廩全活萬人嘗建議增漕以足邊餉嚴令以警邊烽給財以市戰馬設法以完隊伍專任以責成功申禁以息囂訟皆允行之中官汪直用事怒田不私謁遂致仕歸

劉諒分省人物考字守貞興國人景泰間監生授鹽城令延禮良師訓誨庠士暇則出郊勸農親授耘刈之法值蝗禱於城隍蝗皆入海死歲旱禱輒應雨不

出境有一村雨不及廉其故得妻殺夫之寃人尤異
之宿民舍夢有赴愬者明日猶投竈死命掘之下一
古墓為徙葬焉淮賊喬亮屢捕不獲賊過鹽城上官
責諒捕之喬曰毋累仁賢父母自投聽解出鹽城境
仍亡九載考績民不忍舍復留三年致仕歸

龔晟字德輝蒲圻人幼而穎異天順甲辰進士授御
史按廣東時寇猖獗疏陳兩廣不協必建制府以大
臣總督軍務策應乃無齟齬上嘉納行之成化十一

年孝宗六歲尚處西宮中外慮萬貴妃為害首請建
立東宮儲位以定尋疏論元宰李時量移貴州叅議

歸卒

舊通志

徐鏞楚紀字用和興國州人成化己丑進士授行人
拜監察御史巡視通州奏定漕卒輓輸著為令州人
便之復按福建疏災異四事會星變請免慶成宴謫
鎮原令歲饑移民就粟多所全活尋改臨潼父老泣
送之後總督漕運持法糾邪軍民沾惠卒賜祭葬弟

鉞弘治庚戌進士仕至知府鉦癸丑進士官太僕卿
向珍分省人物考字子席大治人由太學授廣西興
業令木頭崗寇猖獗集民守禦成化乙酉韓雍為總
督賊扼其要路使不通珍潛往見之韓奇其來委以
便宜遂破賊以火攻搗其穴擒斬甚衆韓上其功陞
鬱林知州未幾卒民祠祀之城北有向公井珍備賊
時所禱泉也

吳廷舉字獻臣嘉魚人洪武中以成籍隸梧州登成

化丁未進士授順德令潔已愛民都御史徐某欲為
權璫修家廟舉不從適毀淫祠以其材作書院修學
宮廣東盜起陞兵備僉事討平之改兼鹽法時劉瑾
遣官斂諸省庫銀解京意在索羨舉第以額應解又
劾太監潘忠二十罪逮繫獄拷掠枷之十餘日幾死
謫戍雁門逾月宥為民瑾誅召補雲南副使擢江西
叅政討桃源賊深入為所得不少挫久之伺得賊中
要領反執其魁以歸晉廣東左布政使立番舶進貢

交易之法平驛遞之役陞副都御史賑濟湖南土官
相仇殺舉檄諭解疏請陰備宸濠嘉靖初召為兵部
右侍郎上疏忤政府改南工部尋改戶部遷右都御
史巡撫應天中貴張志聰驕橫具疏劾其貪黷狀後
以南工部尚書乞歸衣敝帶穿不事藻飾言行必信
人不能奪所居湫隘無郭外田惟藏書萬卷夜猶披
閱其在太學時兄事羅玘病痢僕死自煮藥飲之
負以如廁一晝夜數十返所著有奏書數百篇雜著

千篇卒年六十六無以為殮都御史姚鎮為營葬湛
若水銘其墓隆慶初追錄賜祭葬加太子少保謚清

惠

明史稿

張璞分省人物考字中美江夏人弘治乙丑進士授
知縣拜監察御史按雲南單車行部遠近凜然時鎮
守中官役軍虐民璞重懲之忤劉瑾逮繫詔獄卒贈
太僕少卿

李承勛分省人物考字立卿田之子弘治癸丑進士

知太湖俗獷悍難治勛以善政變其習徵為南部郎
出守南昌劇賊驕藩內外孔棘勛屢進戰諭降王奇
斬賊胡雪二酋華林賊平境內安輯即疏請蠲租八
年桃源賊起江浙勛策賊所由間道設伏破之歷陞
都御史巡撫遼東節省積羨為戰守芻糧備邊境以
寧嘉靖初晉兵部尚書提督團營惡郭勛驕縱剪其
羽翼十年詔問耕桑禮勛言禮有儀文政有根本惟
上下節儉墾田興水利足民衣食為今日急務又問

郊禘以正經術順人心對卒贈少保上親製奠章諡

康惠子敎官益府長史

參舊通志

戴書分省人物考字天錫崇陽人弘治壬戌進士授
南京大理寺正讞獄原情出補四川僉事持守廉潔
多所興革歷陞苑馬少卿備兵甘肅上安邊疏病歸
家居十載無儋石儲備兵臨安平尋甸安銓之亂以
大學士李時薦巡撫貴州時因寇擾不靖上八可征
策區畫精詳人服其識平生剛方儉約所至有冰蘖

聲卒賜祭葬

胡濂分省人物考字深甫崇陽人幼穎異鑽研六經性至孝旰夜焚香籲天以祈母壽母病躬侍湯藥晝夜不解帶兄弟分產涕泣數日田地自取硃薄者弘治乙酉舉於鄉九試禮闈不第授四川定遠令遷邑築城百姓安堵陞知蘭州未行卒蜀人祀之有疾病就禱輒愈

劉珂分省人物考字公珮興國人弘治丙辰進士令

長洲興學校除盜賊墾民田三千餘畝興水利七百
一十處置義冢三毀淫祠十會有濬河之役水部奏
徵郡屬僱役錢珂力言於當道疏請奏免歲省費不
下十餘萬補太僕丞奏革本寺丞四員陳備邊水利
八事逆瑾亂政乞休歸

鍾湘分省人物考字用秀興國人弘治壬戌進士授
戶部主事擢知漳州府會鄰廣山寇倡亂合一省兵
殲之芻粟日費數百金悍卒不可法馭湘區畫有度

率死士先搗巢穴縛其首惡給脅從者牛粟而遣之
餘賊感泣不戰而巢遂空海寇聞之亦皆就降以功
進階三品祿視叅政歲饑多方賑濟忽疾篤庫有餘
羨數千兩署印者欲私分之湘曰汝欲污吾名耶悉
登簿籍擢廣東叅政未行卒

韓楷字以正江夏人正德辛未進士授刑科給事遷
掌禮科以議大禮廷杖出為知府歷任雲南巡撫
舊

通志

孟廷柯分省人物考字培之武昌縣人正德辛未進士任大理寺副與修撰舒芬等諫武宗南狩謫戶部照磨嘉靖初累擢雲南叅政

仵瑜明一統志字忠甫蒲圻人工部主事紳之子舉正德庚午鄉試第一丁丑登進士授禮部主事世宗踐祚上勤聖學篤親親開言路敬大臣選諫臣去浮屠拯困窮重守令修武備儲人材十事皆嘉納之以原官提督四譯館是時四譯朝貢如哈密佛郎機諸

國中朝權貴黷其寶賂而諸國亦各以貨取鉤致積
有輕心惟朝鮮最恭謹彬雅有上國風瑜則示之以
禮輕重畏懷之罔不悅服後議大禮忤旨廷杖卒隆
慶初贈光祿少卿蔭子密國子生

參郡志

胡堯元分省人物考字廷猷蒲圻人正德辛未進士
授戶部主事以忤權貴謫高郵州同知轉瑞州府通
判己卯夏運糧吳城宸濠叛乃間道還瑞守宋以方
被擒元攝郡事泣諭士民死守請兵王守仁即日具

疏朝廷得奏即擢守瑞州逆黨李蕃掠瑞元偽稱迎
降伏發擒之從督府攻南昌戰黃家渡師次鄱湖與
伍文定縱火焚賊舟遂縛宸濠定紛亂清獄訟輕徭
役恤旱澇建書院以功擢廣西叅政征思恩冒瘴卒
桂林人祠祀之贈右布政使司

汪文明字希舜崇陽人正德丁卯舉人為順慶教授
進諸生語以正學先行後文知彭澤縣稱難治勸農
課桑民日殷阜未幾以勞致疾彭民禱於丹景山及

九隴山竟不起

舊通志

汪文盛分省人物考字希周崇陽人少穎異與兄丈
明友愛篤至正德辛未成進士授饒州府推官時宗
藩驕恣悉繩以法搆誣逮繫日從犴狴中誦春秋三
傳釋還會桃源寇起檄往視師規畫多中入為武選
主事諫南巡械杖幾死嘉靖初擢車駕郎中清冗員
抑璫戚出守福州建三山書院築羅源諸邑城處琉
球諸國貢使遷浙江督學闡明正學交人莫登庸竊

奪稱兵以才望拜右僉都御史巡撫其地宣布恩威
選厲鋒銳卒致底定進大理卿病歸卒賜祭葬著白
泉文集

詹文光字用賓江夏人與弟文慶子乾同舉於鄉嘉
靖己丑成進士歷官知府有廉聲以親老歸養生平
不愧衮影考道問業者常滿戶外

舊通志

馮世雍

詳文苑志

郭懋三楚文獻錄字子德江夏人昭信校尉郭用裔

孫中嘉靖己酉舉人授杞縣諭流賊薄杞邑令棄城走懋毅然居守民藉以安兩臺異之檄代行事城久圯且無軍食令城中樓居者出板片補城隙又令戶出粟一升富者倍之咄嗟而食辦圯皆治賊薄城張蓋鼓樂巡其上以密計縛其來探者賊遂遁去事聞遷威遠知縣丁艱補舒城舒多逋賦立法簡易民爭來輸未及期額已完故事馬歲一徵駒為白御史請計值以銀代民便之江北永為例擢趙州牧奸民

挾弓矢騎駿馬取人道上慙令所屬沿途為牆使不
得馳突行者得無患薦治行異等以忌者中傷力引
歸予三次正域後貴贈如其官

侯應爵字天錫江夏人嘉靖戊午鄉舉授乳源令清
浮糧二百石曲江為韶首邑役頗煩應爵代為均之
鄰邑訟不決發令審理能持平聽斷韶人德焉攝篆
新會創建海城遷廉州同知以勦羅旁首功超遷羅
定僉事擒猺寇飛龍飛虎等撫其衆遷貴州叅議以

母老歸地方利病知無不言楚賦徵米以食衛軍謂之府米力請當道裁其半卒年七十七

呂調音字宗夔江夏人嘉靖辛卯舉人知汝陽遷眉州牧俱稱廉平官歸如寒士知汝時識巡撫趙賢於總角及賢撫楚數式其廬一無所請某王以罪將廢行千金為壽大怒揮去沒後趙為表其墓

以上舊通志

志

熊桴分省人物考字元乘武昌縣人嘉靖庚戌進士

知太倉勸農興學革庫役諸費倭寇入犯時承平無
備桴城守五晝夜倭退明年復至以舟師逆擊破之
功上累陞蘇松兵備南沙寶山之役擒賊首王直捷
聞賜金幣進副使金山軍亂單車召諸將吏笞之誅
其首惡事遂平建城開渠增補田賦陞雲南叅政女
官素儀為亂撫降之移山東會通河決桴相地要害
鑿渠築隄分導三河水患以息進浙江右布政海寇
曾一本圍廣東擢僉都御史往撫之上平寇四策行

鄉約保甲團練法奏蠲魚鹽逋課造戰艘拊士民區
畫具備然後進兵擊一本於潮海敗之疏請置一縣
仍檄安南備境上勿令南逸賊分據馬耳嶼牛田洋
檄閩兵圍之一本誘日本王丘古所寇惠州值把總
周雲翔叛為倭內應桴急縱火焚賊縱反間誅雲翔
獲丘古所隨擒一本於蓮花澳以功進副都御史積
瘁卒於軍贈兵部侍郎賜祭葬廕子入監

尹相三楚文獻錄字商衡嘉魚人嘉靖壬辰進士授

行人遷南刑垣南太廟災疏陳六事上嘉納之糾劾
武寧侯配享霍尚書紛更晉北吏垣都諫時嚴嵩父
子擅權相正色獨立嵩銜之會御史何維柏疏論嵩
嵩遂奏相黨維柏被逮下獄廷杖八十楊繼盛周怡
同在獄見相灑然無怨色歎曰蒙難正志尹子庶幾
再閱月釋歸一驢一僕就道抵里門簑笠躬耕穆宗
即位以遺詔錄言官堅卧不起加秩太常致仕

方逢時三楚文獻錄字行之嘉魚人嘉靖辛丑進士

歷官廣東兵備駐節惠州山賊花腰蜂等據白馬室
搆亂十餘年官軍屢敗時用奇設間遣兵據要害斷
其援適倭寇復至賊黨徐某潛約倭圖花時知之移
檄示花花殺徐時乃擒花斬首千餘級隨諭長樂賊
葉再樓殺倭自贖葉喜從之時陽遣官護其家而以
大兵隨之遂斬葉境內帖息遷巡撫進兵部尚書太
子太保乞歸御書盡忠二字及丹心葵向日勁節竹
凌風一聯賜之

周冲江夏人字深甫嘉靖癸卯舉人初任德平教諭陞江安令廉潔有惠政會檄採買多病民冲遂上印綬辭歸署中物一無所取家人私一門幔冲知令還之居林下貧若諸生年七十七卒江安祠祀之

縣志

張東周字子用蒲圻人嘉靖丁未進士授刑部主事先是臺中有許福疑獄歲餘不決東周勤四日夜勘積案得其情全活甚衆世宗大悅書名於屏遷主客司員外上疏言崇正學七事適嚴嵩以賄冊立一富

藩周力爭嵩銜之出僉滇憲兵備普安緬甸恬息以
積忤權璫謫漳州倖吏畏民安後卒於官

舊通志

謝存儒分省人物考字懋珍蒲圻人嘉靖丙戌進士
初為行人奉策澧州王却其貺金遷給事中條陳急
務會論許祭酒失職狀謫判邛州繩下以法不少貸
舉學勸農他郡獄多屬決焉歷禮部郎中擢南昌府
勤於職事以廉敏為下僚先會歲旱存儒上計還大
雨如注人咸忻悅叅政陝西檄諸郡墾田積貯繕甲

兵具卒乘修城堡邊聲大振尋陟山東布政年饑穀
貴奏省漕運過半晉副都御史巡撫河南疏請折鈞
州陶器價釐革祥符炬夫費以資軍食黃河決令水
工準高下濬支河河不為害晉兵部侍郎

魏裳字順甫明一統志蒲圻人嘉靖庚戌進士為人
質直好讀書親喪杖而後起以刑部郎出守濟南除
淄萊盜均章邱賦濟人德之晉山西副使罷歸杜門
著書有雲山草堂集輯湖廣通志七十一卷

龔良傳分省人物考字起巖蒲圻人嘉靖丙戌進士
出使淮藩餽金不受任工部主事濬徂泉源建南
旺諸閘漕運以濟歷浙江僉事金衢俗多溺女嚴禁
之與萬雲鵬徐階張岳氣節相尚浙人稱為四君子
叅議河南捐俸賑饑陞山東副使卒於官

汪宗元分省人物考字子允崇陽人嘉靖己丑進士
累任南太僕寺卿修馬政條例遷太常卿修太常志
輯國朝名臣經濟考遷副都御史督理河道忤嚴嵩

罷為福建叅政尋轉右布政使外禦倭寇內察民艱
復三運八運法歲省民金萬餘釐其賦為正辦雜辦
檄汀建諸鹽商使畫疆而鬻又檄南塘洪塘去其冗
稅鹽利以興歷官通政使致仕歸養卒賜祭葬

汪宗伊分省人物考字子衡宗元弟嘉靖甲午省試
第一戊戌進士初令浮梁有政聲入為兵部主事以
執論楊繼盛劾嚴嵩孫鵠冒軍功事忤嵩免歸隆慶
初起南吏部郎中歷應天府尹裁諸司供億歲省民

財萬計萬歷初累遷戶部尚書總督倉場致仕卒年七十九賜祭葬謚忠惠著有表忠錄靖艱諸賢紀名立石南雍

劉景韶字子成崇陽人嘉靖甲辰進士以縣令遷部郎為貴州僉事擒苗首王黻等撫其衆倭犯淮陽晉海防副使卒成淮海之捷淮人築京觀立生祠晉撫鳳陽以內艱歸晚益好學著疏議燕臺秋蛩太白原稿

徐綱字浴泉興國人嘉靖甲辰進士除西安推官擢
兵科給事中敕勘邊務靜正不阿世宗建醮命諸臣
黃冠行香綱極諫廷杖瀕死復諫尋轉順天府尹隆
慶元年授工部侍郎修世宗陵寢成封三代廕子
萬歷中晉本部尚書卒賜祭葬

以上舊通志

吳國倫

詳文苑志

劉師穎明一統志興國人嘉靖癸丑進士累官武選
郎中清戎籍督武學閱馬政咸有條理以母老告歸

呂調陽字和卿大冶人由廣西籍嘉靖庚戌廷試第
二人累官大學士同張居正輔政文章德業備極榮
遇卒贈太保謚文簡

舊通志

朱廷立字子禮明一統志通山人嘉靖癸未進士官
禮部侍郎質任渾樸進退可否動以古道自持立朝
忠厚正直好理學喜文辭至老不倦

舒大猷通城人嘉靖丙午鄉舉官至浙江布政使凡
歷十一任薦舉二十有四欽賞銀幣七次事跡詳萍

海紀畧歷任拙錄家居集著有儒林粹議清心亭雜稿

周文卿字蓋之江夏人隆慶辛丑進士任南海令以清潔聞邑糧為害乃清無稅沙坦補無田之糧七百餘石又小海中多涌源豪強利焉悉清之以利農桑歷陝西兵備副使致仕歸

常居敬字惟一江夏人萬厯甲戌進士授南昌推官訊獄詳慎掌工科以督理漕河功遷太僕卿巡撫浙

江時倭寇披猖自募兵三千人討之而以千人助攻
寧夏糗糧自備上嘉其忠弟居安字惟靜由鄉舉仕
至延平通判

以上舊通志

郭正域三楚文獻錄字美命趙州守懋仲子萬厯癸
未進士選庶常博極羣典尤究心河漕鹽屯四方風
土人物利弊興革之宜侍東宮數奏明暢遷南祭酒
上監規七事李都督者寧遠裔孫魏國壻也騎過文
廟博士執而扶之侯家奴大譁魏國亦盛怒正域徐

曰以博士扶都督誠過然祖制公侯子入學習禮亦國子生耳奈何走馬先師文廟是博士扶國子生非扶都督也令交相謝而止比還朝遷禮部右侍郎以謚法濫議奪議改與執政沈一貫力爭之巨璫魯保既竊兩淮鹺政更請兼江南浙江織造域不與關防楚宗華越奏楚王華奎非恭王子王賂正域域疑之請行勘並以楚賂上聞又疏辨語侵一貫縱楚王訐之勒歸聽勘行次楊村妖書事作上怒下詔大索盡

械僕婢拷掠無所得免歸及卒無以為葬具熹宗即位贈太子少保廕一子中書舍人謚文毅

吳裕中

詳忠臣志

任家相字白甫江夏人為諸生與郭正域賀時泰齊名戊子舉京闈署婺源學博教化有方建文起堂刻朱子孝經刊悞輯儒林論世及景行編以楷模多士遷翰林待詔充福王講官上勸學箴條陳時務尊孝經以定試題制宗學以廣人才祠國學以崇名宦鄉

賢慨然以天下為己任晉工部司務卒於官

舊通志

賀時泰三楚文獻錄字陽亨江夏人少為諸生不妄
交遊貧甚力學課子教授生徒嘗歲除糧絕以一雞
二升豆易米七升具三日食賦詩自勵云清苦丈夫
志風霜善自持迨子逢聖貴即書堂對聯云當年雞
豆未忘念此日兒孫莫妄思泰年二十七兩耳失聰
著有思聰錄及人模樣女箴二十四則行於世
劉民悅字時可江夏人萬厯己未進士授富順令其

俗豪役貧賤代貴巨室收賦多不歸縣藏悅悉為釐
正每讞斷不肯曲承上官指有中之者改蘇州教授
飾學宮攷古祭器樂器作郡縣志再遷南戶部主事
筦江北倉例多羨餘盡籍以報部尚書鄭三俊服其
廉正遷知汝寧府部有持官府短長者得其名悉寘
於法暮年罷歸

舊通志

孟習孔三楚文獻錄字魯難武昌縣人少補諸生有
重名登萬曆乙未進士授香山令其地番漢雜處嘗

以互市起爭孔單騎諭散調吳縣丁內艱歸補曹縣
均徭平賦精水利漕河工成歷遷開封府守晉太僕
寺卿尋以楊漣及禍一時楚人俱削籍孔亦被劾歸
里璫敗詔復職卒不出

趙邦柱分省人物考字安甫咸寧人萬曆己丑進士
授戶部主事司權崇文門課九門鹽法秋毫不入橐
改吏部累遷通政叅議故事諸中貴請乞詞訟動至
破產柱痛抑之闕說不行有承某具疏言天下事以

時宰方楊綰文彥博柱謂熒惑視聽屏不奏乞歸尋
卒

孟養浩字義甫咸寧人性孝友萬歷癸未進士授行
人遷諫垣時國本久虛言者率獲譴浩典閩試首以
明倫發策還因具疏極言其不可謂皇子天下根本
臣下請豫教為慮至深今乃動而得咎誰復為陛下
言者上覽疏震怒拔劍立閣中勅廷杖百杖至十輒
報報輒以劍斫柱深寸許浩大呼高皇帝遂昏絕不

復省久之乃蘇削籍杜門著景行篇見志光宗立起
南少常晉僉都御史提督操江以留都根本日簡車
菟卒厲器械繕城堞遷南戶右侍郎卒廕一子入監

遣官祭葬

舊通志

李沂三楚文獻錄字景魯號太清嘉魚人萬厯丙戌
進士選庶吉士與修會典試玉壺冰稱旨遷吏垣時
廠臣張鯨怙寵橫行沂入垣甫七日即疏鯨惡上怒
命逮送鎮撫司廷杖百鯨密囑斃之沂大呼太祖高

皇帝天忽風霾杖下覺不甚痛九卿臺臣疏二十上
閣臣申時行許國王錫爵先後密救卒不聽沂卧創
邸中上密遣官偵之見沂被粗布百結皆泣去時海
內有十君子之謠沂其一也光宗即位贈光祿少卿
李憭三楚文獻錄字景穎嘉魚人萬厯己丑進士例
授節推聞兄訃哀請給假歸庚寅謁選得衢州一署
府篆再署西安不私羨錙一錢嘗行縣治盜鹽者又
留意武備選刻百將傳以示嚮方每較卒則紀律明

賞罰信浙撫常曾檄所部千人歎其練習未幾丁內
艱廬墓三年補禮部主客奉命冊封蜀藩有門生新
涖縣執贄為壽却之曰君不知故人且而初入官將
焉得此入蜀餽遺一無所受奉命督催楚豫逋賦但
以文移傳知秋毫無擾歷遷太僕少卿晉光祿卿
魏珩如字白叔蒲圻人萬曆辛丑進士授湖州教授
歷國學博士擢翰林檢討為福藩講官叅兩浙七鹽
條行六款開湧金門通百物浙人賴之以病假歸

曹志遇字古難興國人萬厯戊戌進士除戶部主事
知重慶府為政嚴明每庭燎視事昧爽而畢有蹇尚
書子不法按如律先是郡人某知興國遣人戕其弟
於路令截一手復命遇素切齒至是窮治泄其冤鄉
人有為其屬吏者以墨聞亦不少貸有知人鑒試童
子首拔王應熊轉羅定道致仕子景叅字大箕懷宗
辛未進士官至南吏科都給事中

以上舊通志

汪廷材

詳孝子志

張文光字公瑾江夏人博學能文於書無所不讀萬
歷戊戌成進士授檢討以論楚藩事忤沈一貫謫光
山丞久之遷尚寶丞每慷慨陳言述古今法戒修身
講學之要尋遷少卿

舊通志

熊廷弼三楚文獻錄字之岡江夏人慷慨負氣高文
偉辯身長七尺餘膂力過人能左右射萬歷丁酉舉
鄉試第一戊戌成進士授保定推官察吏治簡軍實
詢民隱事無巨細咄嗟立辦讞獄平反其所雪冤濫

及改矜疑者計三百餘人兼攝郡篆嫖奸櫛弊悉除
民疾苦作徵收法撫軍汪應蛟下其式於他郡凡六
載考居天下理官最擢御史出按遼東辛亥督學南
畿衡鑑精敏拔寒士斥要津中蜚語歸會郡邑頻水
乃請當事督江咸嘉蒲四邑民築長隄二百餘里至
今賴之戊午詔起大理丞兼河南道御史隨授兵部
侍郎兼副都御史經畧遼東熹宗立言者論其師老
財匱遂引退未幾復起兵部尚書賜蟒玉賜宴令公

卿祖道本兵張鶴鳴獨設饌三十里外冀人稍間有私言弼至飲三爵鶴鳴甫開口廷弼輒擊案大言曰今日不得言邊事鶴鳴由此深銜之後因王化貞失廣寧鶴鳴袒化貞歸罪廷弼法司會勘寘之獄時楊漣劾魏璫二十四大罪議者謂出弼手遂棄市傳首九邊璫敗化貞伏誅次子兆璧徒步詣闕下訴冤又輔臣韓爌亦為伸理詔還首歸葬謚襄愍

魏詔字奉之蒲圻人萬曆丁未進士累官刑部主事

會御史劉光復以直言下獄抗疏論救忤堂官意然
光復竟得免熱審調兵部武選專理青黃內監明廉
欲干黃政詐言勤勞希冒廩糈疏糾之上為斥廉遷
江西督學以崇雅黜浮拔幽疏滯為務乞歸卒年六
十三

佟養直奉天人寄籍江夏因家焉精韜畧嫻技勇為
開原叅將曾陷重圍衝突而出後贈鎮國將軍都指
揮同知

佟卜年字觀瀾養直子萬厯丙辰進士初授南皮令
調繁河間尋遷夔州同知素善熊廷弼薦卜年有經
濟才陞山東監軍僉事後廷弼被論媚璫者並構陷
卜年竟寃獄死子國器官至巡撫

以上舊通志

賀逢聖

詳忠臣志

熊兆珪

詳孝子志

何應軫

詳忠臣志

明睿

詳義士志

馮之圖字書先興國人懷宗甲戌進士任漳南叅議
風節矯矯歸里講學於武黃之間坐卧一小菴丹鉛
輯錄寒暑不輟自號鹿山老樵尤邃於易年八十四

卒

舊通志

吳茲明

詳忠臣志

孫鵬舉

詳忠臣志

皇清楊于崑字五美世居黃陂隨父泮所徙江夏初工
制藝入縣庠未幾棄去習韜畧成武進士授鎮巢

守備撫降尚苗晉叅將久之辭職歸性純孝嘗割股愈親疾教子兆傑極嚴雖燕閒不假顏色小拂意輒與以杖傑亦以孝聞另傳

周有行武昌縣人年十二喪父獻賊亂奉母避深山
中供養無缺時稱周孝子撫孤姪士登如已出
鄉人有鬻獨子者傾囊贖之嘗買妾聞已字人立
還之不索原值且戒家人勿暴其姓名子士皇城
進士人以為陰德所致有行曰好事讀書人所應

為科名讀書人所應得報施之說非吾所知也後
士皇宰扶溝值歲饑命委曲賑濟薦入都臨行
囑積粟一條首當奏請士皇官侍御遂上積儲本
計疏得報可年逾七十燈下猶作蠅頭小楷

許立達

詳忠臣志

陳肇昌字扶昇江夏人原籍黃岡順治戊戌進士
授寶雞令招徠撫字蠲除逋賦陞工部主事轉員
外晉刑部郎中康熙十七年督學廣東時兵燹士

多流亡肇昌加意招徠秉公甄拔嶺表賴以起衰
復廉士之貧者量為周給所至申明條約嚴飭學
校士習以淳時軍興旁午例許入貲肇昌於各學
正額外甄拔遺才示勸士鼓舞焉考成居最陟僉
都御史授順天府尹九卿廷試會推秋讞諸大政
多從其議條上輒報可生平好讀書未嘗以倥傯
廢子六登第者五人

汪錞字鐘如江夏人康熙庚戌進士初任中書轉

戶部主事典倉差糧儲皆手自清算積弊一清考
選吏部歷四司者十年黜陟大政引例據典毅然
持正不阿滿漢家宰倚重之乙卯分校順天甲子
典試陝西咸稱得人年六十卒諱事母極孝性尤
友愛

張謙

詳人物志

漢陽府

漢董永

詳孝子志

元管如德元史列傳黃陂人任江州都統制能一手挽二弓世祖南侵如德先登陷陣以功遷浙西宣慰使上時政五條累遷江西行尚書省左丞招降廣東盜鍾明亮卒封平昌郡公謚武襄

明丁普郎

詳忠臣志

周梅明一統志孝感人洪武初舉卓行歷官福建按察僉事性簡樸勤於民事冰蘖之操始終不渝

陳傑字彥卿明一統志漢川人舉洪武庚午鄉試初

授戶部主事陸吏部驗封司員外永樂五年調北吏部員外歷江西右叅議性明敏耿介歷任勤能皆有治績

鄧鑑

詳忠臣志

王琰分省人物考字廷用孝感人成化甲辰進士授戶部主事戚畹壽寧侯奪河間民田琰奉命往勘以田歸民歷擢山西布政運餉饋軍頗著勞績後忤劉瑾免官瑾敗起都御史未任卒

嚴正字廷瑞明一統志孝感人成化丁未進士授大理評事擢衛輝府知府性仁厚為政平易不尚苛刻衛輝火當道欲罪守者正引為己責全活千餘人去後民祠之孫志迪字子吉正德辛丑進士授南評事博雅好文早卒

汪頡

詳孝子志

張文迪字德敷孝感人少失怙事母黎氏以孝聞弘治甲子舉於鄉知威州歲旱賑恤有法流民趨歸之

遷永寧同知鳳詔文作亂奉檄率蠻兵討平已念母
棄官歸年方強仕及母卒哀毀盡禮鄉人稱焉

傅桂字汝芳漢陽人正德甲戌進士令陳留招集逋
逃復藩府侵漁民業擢雲南道御史覈儲闕陝巡撫
雲南賢察官吏簡覈兵衛三上疏諫武宗南巡不報
世宗登極六疏陳大計事臺端重之

以上舊通志

戴金分省人物考字純夫漢陽人正德甲戌進士授
蘓州推官世宗初擢監察御史獨立敢言風采凝峻

五年巡視兩淮鹽政條奏十餘事請通鹽法以資民
用節費省緡得羨金六十八萬佐邊餉出按四川值
滇南安銓作亂會兵討平之芒部隴氏以爭承襲不
明廷議討之而設流官其酋隴政等益叛匿於是滇
蜀皆擾金抗疏言用兵耗財為非因會議處置七事
躬入險阻撫定之尋陞南太僕少卿尹應天二十年
入為大理卿兼副都御史撫四川歲饑請帑金二十
萬賑之全蜀之民卒免溝壑已復召為都御史明年

晉兵部尚書兼督團營金被命感激乃條奏備邊十二議曰別武材稽分領實缺伍練民兵修戰車慎養馬備關隘重墩臺謹盤詰處降人養死士選土兵悉命酌行之立朝未久言者忌而攻之乃乞歸旋以疾卒詔賜祭葬金熟於典故當事明晰所著有三難軒集使蜀海防等稿江西詩記棘署餘文藏於家曾孫自成懷宗辛未進士

朱衣字子宜武昌籍漢陽人正德庚辰進士授監察

御史清戎江北值大饑人相食以便宜發粟賑濟全活甚衆時爭大禮世宗召羣臣議闕下衣直言與張

孚敬忤遂罷

舊通志

張緒三楚文獻錄字文綸漢川人幼穎異善屬對邑人劉大本奇之乞養為已子因劉姓名燧時纔九齡嘉靖庚子弱冠登賢書第四復姓張更名緒號甌山師鄒文莊守益友耿恭簡定向潛心理學就桐城諭入都謁張居正以年德抗上座不為屈轉南監博士

歷戶部員外郎日與耿天臺羅近溪李見羅講學時
宰忌之謫繁昌諭移令德陽甫一載告歸

朱寵字德承武昌籍漢陽人嘉靖甲辰進士令海門
海饒邑寵自誓清白無所染豪貴以暴橫凌小民寵
特立不避皆斂跡乃從容課農桑興學校杜胥吏之
奸革里甲之濫邑大治擢監察御史適嚴嵩柄政慨
然草疏欲劾之未上而父艱聞居鄉閉戶與張緒講
學家貧至絕糧不顧疾革藩司陰餽金五百為殮具

力疾卻之

王秩字伯庸漢陽人天性孝友嘉靖癸卯弱冠舉於鄉甲辰成進士授天長令復除婺源遷戶部主事調吏部歷四司員外郎中剔除蠹政己未分校禮闈所得士咸為名臣擢太常少卿以忤嚴嵩出為河東副使因拂衣歸神宗時起撫江西柄政者銳意羅秩秩辭疾家居三十年時論高之

曾廷芝字子先漢陽人嘉靖癸丑進士令昌邑擢工

科給事中奏修河防增屯田水利專設憲臣督理悉
為上所嘉納以不承權相意出為浙江僉事謝病歸
蔡結字國凝漢陽人嘉靖癸丑進士初令東鄉調臨
海嚴明果斷二邑皆立祠祀之擢江西道御史巡按
廣東蕩滌大憝海南清宴歷藩臬以卓薦陞陝西行
太僕寺卿

以上舊通志

蔡完分省人物考黃陂人性孝友甘貧重義嘉靖丙
辰成進士初令蘭溪潔已愛民以賢能徵百姓乞留

不得補御史有直聲卒於京囊中僅存足紆同官賻助乃歸巡撫趙賢以贖鍰助葬

鄭佶黃陂人嘉靖庚戌進士兩任縣令遷大理評事給諫吳時來主事董傳策疏擊嚴嵩下獄佶保全之出守雲南繩黔國以藩臣禮謫判通州征繕御倭有俘獲功得賜金再守尋甸平叛酋安詮解南中大患以剛直歷事兩朝及歸月俸悉分給三黨家無長物徐尚彝黃陂諸生性質純篤嘗私誌某日某事背理

當改某日與某語涉欺宜痛自刻責人目為迂而彛
自若事親孝嘗鬻田為弟償債以餘值分族人弟鬻
已田召與歡飲不言時秋糧加餉彛糶穀代償不累
其族家素饒以輕好施而貧至授徒餬口又不屑錙
銖脯修竟以窮死

任惟賢字功懋黃陂人嘉靖庚子舉人三宰疲邑致
政歸貧甚與耿定向講性命之學會秀水戴某卹刑
至楚知其貧為釋三寃獄令取賢回牘囚持金其門

賢曰皇恩卹汝我何與焉卻之去且囑曰勿令兒輩
與僮僕知恐來求索也耿嘗過從見其四壁蕭然布
袍芒屨與二三門人詠歌論道自朝至日昃菜根麥
飯出語人曰功懋今日之原憲也著有五經註釋以
上舊通志

方一鳳

詳文苑志

王霽黃陂人嘉靖辛丑進士令吉水時朝廷行方田
法日與羅文恭講求行之民以不厲補戶曹擢守保

寧採木命下調護夫役嘗弭巨盜多惠政觀察雲南
戢黔國之橫解黎副使林叅議獄尋以太僕致政歸
羅文恭匾其堂曰清白

舊通志

張天爵

詳孝子志

黃雲闔三楚文獻錄字時闔黃陂人性沉靜端凝以
明經除泰順訓卻寒士贊得俸輒以周貧者已遷濟
源諭起復初書院講周程之學一廩生開郤於令上
之督學督學詰之雲闔正色曰有一生但為令所不

直耳實無他生得解陞歸德授署柘城令時柘荒蠲
其逋盡停催科勸勿訟凡六閱月轉鼇山衛竟拂衣
歸行李蕭然惟來時二篋而已見僕攜有火筴切責
之曰何故以寸鐵累人予彥士奇士

程學博字近約孝感人嘉靖己未進士授工部虞衡
司主事擢守重慶五日未得旨張居正忽以單刺延
入內閣與語片晌揖之退謂人曰重慶得人矣即日
命下治重慶清嚴剛直於郡治前造房數十楹設井

竈以居解犯獄不淹時庭無積案白蓮賊蔡百貫邪
說惑衆博畫策盡殲其黨再守兗州擢淮陽兵備調
貴州叅議時東川烏蒙烏撒芒部祿壁水西為患諭
以利害背心惴散去遷雲南兵備下首白改諸寨作
亂遣間入其營購賊使內應出師夾攻之三日擒賊
首八人降二百餘人擢行太僕卿致仕歸

傅偉字夢合孝感人幼事父母以孝聞由選貢授浙
江新昌令潔已愛民甫三月偶誦陶詩慨然曰吾子

官已在吾上何必戀五斗令陶公笑我乎遂解組歸

子淑訓

以上舊通志

蕭良有分省人物考字漢冲漢陽人年十五中嘉靖
甲子鄉試萬厯庚辰申時行主會試置第一臚傳第
二丁艱歸起復晉修撰充經筵講官時攻張居正者
衆良有獨曰江陵非奸相稍恃權而驕耳建儲議起
王錫爵主並封三王之議良有同馮琦上疏力爭領
國子祭酒慨然曰北李南陳遺規可做也杜于請嚴

考課定京省取士法戊子甲午典試燕浙丙戌己丑
分校禮闈孫太保承宗朱少保國貞孫太保慎行陳
司馬道亨皆出其門乞終養歸八年卒天啟初以講
幄功贈禮部右侍郎子丁泰另傳引萃官戶部郎中
有才幹

參舊通志

蕭良譽分省人物考字漢穎與兄良有並以文章顯
萬厯庚辰同登進士時稱三楚二難授戶部主事典
試陝西歷郎中出知寧國府以公廉自誓望之清凜

逼人即而就之藹然可親在郡四年未嘗厲聲色以拒人自無敢以私謁請者每朔望率士子於學宮講析書義旁及民間疾苦至午始退拔湯賓尹於諸生中每語人曰湯生文脉酷似家伯兄異日名第定相當也後果如其言兩任提學衡鑑超異卓絕一時官至河南叅政

李鍊字東泉漢陽人太常宗魯之父性倜儻好節俠濟貧周乏家中落弗恤不喜近貴人賢士大夫皆敬

禮之

舊通志

李宗魯三楚文獻錄字學仲漢陽人居恒以名節為已任萬厯癸酉魁鄉試甲戌成進士在中秘五年國家諸大典無不擘績改兵垣考察軍政執法無所徇忤執政出為浙江僉事會浙兵變縛直指魯徐諭以利害乃得釋口稱活命恩心實銜之謂宜擬魯以失律罪張佳應執不可曰此審定亂者何人也調廣西兵備遂掛冠歸創義田設塾學賑貧乏托友之孤與

托其弟孤皆可為世法子若愚另傳

王維祐字培梧漢陽人中萬厯己卯鄉試初任鳳翔
司李沉寃大辟皆賴平反以卓異擢石屏州歷安順

軍民府歸里中稱為仁厚長者

舊通志

常道立字五疑漢陽人性嚴毅剛方萬厯庚戌進士
任青陽令調祁門皆清慎明允丁內艱起知固始報
最陞吏部稽勲司調文選時選政倒置加意釐剔忤
權貴降南直別駕晉溫處道革陋弊禦倭寇諸郡服

其神明轉海寧甫泣任卒

吳嘉謨字績可漢陽人萬厯丁未進士令新建邑多盜擒其渠魁餘乃散戊申大浸買舟數十遍歷諸村渡之因請賑請蠲請改折又請寬二百里長港禁復築長豐圩隄以防水擢戶部主事管太倉宿弊盡洗遷員外郎中出守揚州以疾告歸予守中任黃安教諭

謝燭字斗南漢陽人性篤孝親歿廬墓風雪不避以

明經令曲江余寅作亂羽檄交馳燭修城隄繕守備
余平燭歸家居十三年卒子淳培天啟甲子舉人

李若愚字愚公少從張緒講學萬厯己未進士司理
溫州平反殊死以下數千人時趙南星高攀龍秉憲
推東南賢者必首及之卓異赴考選媚璫者指為楊
漣死友署下考久之遷刑部主事因天旱陳言請誅
魏黨許顯純等七錦衣以慰忠魂比顯純等伏誅甘
霖大沛掌武選不苟一錢遷江右叅政值流寇蔓延

保障功多解撫軍舉以自代遽請告歸為司理時分校浙闈庚午典試廣西乙亥主江西拔貢試皆稱得人子應槐庚午副榜應橋另傳應梓丁酉副榜以上

舊通志

程學庸字近道由舉人授青城教諭遷榮澤令罷歸嗜學不輟卒後京山李維楨銘其墓

孝感縣志

張濤三楚文獻錄字元裕黃陂人萬厯丙戌進士初令富順以異等徵入諫垣即詣闕上書語侵政府疏

列儲教宜簡良弼劾大司馬及兩經畧奸欺狀又指斥大璫不法事忤旨謫海外閉戶十五年儲位定召諸言事臣起新安令由戶部郎督餉宣大䟽邊腹利害甚悉神宗嘉納勅所司行之轉光祿大理寺丞陞遼東巡撫丁艱歸卒止遺一女適諸生韓邦舊苦節無愧乃父

吳有成字太初新安大姓父文仲依外氏留居漢口遂為漢陽人天性孝友有隱德瞻族睦隣萬厯間中

官陳奉督楚礦稅甚急成善其幕客多所保全課子
孫以忠孝為準以孫正治貴累贈光祿大夫

張大猷字允升黃陂人甫九歲暮歸迷路有黃衣老
人指引還家遺以紫金飛燕長善屬文萬曆乙未成
進士初令徐聞調香山邑試拔何如寵延入署中三
載官至山西布政政事文章卓然可紀

吳之皞字北陽黃陂人父子榮素勵名行一日偶出
馬蹶祝曰我有遺行歟歸問家人適以爛麥易貨榮

焚香自責萬厯甲辰皞成進士令霍山邑荒僻無科第且茶稅重民多逃散乃請捐茶稅三之一招集流亡借存留歲額給牛種墾荒又請捐逋賦之半教民紡績勸農課士作九經詳解訓之士始有捷者擢侍御按蜀探知奢酋欲動疏其狀與督撫密謀禦變捐俸增城堞修戰具飭將士扼險要已而奢叛郡邑賴以全陞大理少卿抗疏劾魏忠賢罷歸

以上舊通志

黃彥士三楚文獻錄字抑美黃陂人萬厯甲辰進士

授行人晉御史會考定太后崩贊神宗行三年喪神
宗是之曰黃御史真君子及按茶馬詳考牧政條利
害上上之光宗踐祚復條上十款自聖躬以及邊防
俱切中時政熹宗立上講學䟽按中州見潞藩稅監
苛橫杖其渠數人立撒稅監以袒附有司奏按強豪
不少貫卒以抗直左遷歸作甘露書院密邇程祠日
與其弟商求聖學

黃奇士三楚文獻錄字守拙彥士弟萬厯甲子舉於

鄉就壽州學正設四科教士首德行次經濟三制藝
四騎射詩賦遷南雍移戶部司務其學以靜入以悟
精以修實生平如聘死友遺女還孤兒原金及募兵
壽春纂修江北諸郡邑志皆不愧所學子墀嘗舉庭
訓云作文易做人難顯親易守身難登壬午賢書

鄧光舒三楚文獻錄字葆之黃陂人萬曆丙午舉於
鄉授浮光廣文歷廣南守廣郡荒遠祿土司普名聲
皆擁兵不遜馳檄諭之立解幼嘗為後於伯父伯父

年七十六舉一子舒撫循教訓既長舉遺產授之乃復歸本生父父從鄰家飲中席仆地而殞舒遂終身不忍與燕會聞音樂輒悲感泣下

魯伯溶孝感人少有時譽中萬厯庚子鄉試為軹縣令軹稱難治有顯者撓其法遂告歸其學內本性命外該經世之業殫力研究以躬行為本

李應橘字敬仲漢陽人由明經選授中書祖宗魯曾居此官以是熟諳典故掇遜國遺事著闡幽錄補外

史所未備三年書成解官歸父若愚任江西叅政舟
過鄱陽狂風突作頓隔中濤顧父舟不得籲天請以
身代須臾見有白衣婦相招救性好施有女子嘗受
活命恩夜來奔叱去之集諸格言著德慧書以訓子
孫及卒賀逢聖銘其墓以子昌祚貴贈中憲大夫大
理寺少卿

以上舊通志

張國勲

詳忠臣志

陳壽

詳孝子志

胡天起字仰文黃陂人慕周程學不競時名嘗傾儲
贍饑還遺金初艱嗣處諸兄猶子友愛無間悉分產
物與之晚舉子竟不復問開館講學時為鄉里解紛

子明垣成進士

舊通志

譚德化

詳義士志

鄧謙

詳忠臣志

程學古

詳孝子志

胡其俊孝感人父早歿力耕養母暇即勤學成萬厯

丙辰進士初令永清調固安皆有惠政擢山西道御史遇事敢言忤阮大鍼出為陝西按察使

劉應遇字玉庸孝感人萬厯辛卯舉於鄉令永寧減廩生郭榮國罪擒亂民張國安發奸摘伏吏民畏之調靈寶定礦賊之亂歷戶部郎中忤魏忠賢懷宗即位首言天下六大苦情聞發忠義逆璫以誅為商雒道白水盜起饑民多附之令郡邑開倉賑濟饑民既散盜首遂自縛請降未幾漢南盜復熾攻城掠鎮討

平之巡撫甘肅紀律森嚴賞罰明信卒贈右都御史

廕其孫興宗

以上舊通志

程良籌

詳忠臣志

程道壽

詳忠臣志

傅淑訓字啟昧號東渤孝感人萬厯辛丑進士弱冠知濮州濮巨憝藪盜怙勢姻莫敢詰訓以計擒抵之法已調澤州轉工部員外出守平陽有異政舉卓異第一擢山西驛傳旋改督學還商維叅政癸亥備兵

安徽甲子召為太僕少卿坐與楊漣姻家削籍懷宗
戊辰召補順天府尹歷官戶部侍郎以終養歸丁丑
起督南北直隸及各省勦餉建行臺池州丁母憂服
闋以右都御史召管兵部侍郎至則改戶部尚書會
羽檄旁午訓多方措辦有佐計勤練之褒尋策免歸
里家居十餘年卒子如金如圭

程註字爾雅孝感人萬厯庚戌進士授行人考選給
事中論客魏子弟世襲錦衣引祖制以裁之不報削

籍養馬當差懷宗戊辰起大理少卿累官南工部尚書還里卒橐中僅白金三兩聞者歎其清節

夏時亨字孟嘉號涓水孝感人天啟壬戌進士授戶部主事陞郎中督餉延寧力主興屯田遷知興化府時當大賚親身頒給稽虛伍扣存賞銀八千兩充抵京運後陞河南右叅政督理糧儲革委官買糧專責州縣隨徵隨買諸弊悉除轉四川副使癸酉陞本省叅政兼副使管屯驛又遙攝川北守巡事兼視臬篆

甲戌流寇由興安分路入蜀亨扼要保寧繕戰守隨
機應變擒賊甚多尋以病歸樹寨白雲山捍禦闖賊
鄉人德之卒年七十五子焯壬午歲貢隨父禦寇有
功撫按題授監紀通判後父喪哭泣而歿煒另傳

王道直字履之漢川人天啟壬戌進士授保定推官
郡守欲建魏瑞祠直持不可瑞敗擢御史會張慶臻
勅書事發臺省交叅懷宗召諸臣入對直面奏臻實
行賄上嘉納稱為真御史掌河南道劾逆黨邱兆麟

漏網緹騎械至鬼擊而斃晉右副都御史提督操江
時流寇數十部犯安廬瞰金陵直勵將士置炮船分
據采石小孤諸要害屢拒却之歷左都首列臺規四
十條帝書名御屏註曰小心謹慎壬午謝病歸父母
繼逝素冠終其身尋卒

以上舊通志

皇清沈惟炳字炎洲孝感人萬厯丙辰進士授香河令
考選刑科給事曾紅丸移宮二案下廷議朝士有
謀為李選侍翻案者炳上疏力爭諸黨人欲借熊

廷弼株連楚人炳再疏切言之璫邏卒徧京邑矯
駕帖置立枷炳疏入熹宗面斥忠賢立枷之法始
廢又爭魏大中夏嘉遇等不應降級忠賢怒下中
旨降級調外楊漣死炳鬻產得數百金以贍其母
梁孟環劾其黨邪害正削籍懷宗初起刑科右給
事累遷吏部左侍郎順治初仍以左侍郎掌部事
尋謝政歸卒子宜鎮江推官寅廣昌知縣寬香河
知縣完邑名諸生

程良孺字穉修孝感人早喪父哀毀過禮克承母教篤行孝友以選貢入成均懷宗戊辰知行唐歷戶部主事管鳳陽倉乙亥以獻賊犯鳳陵解任回籍順治初起戶部員外郎管潯墅鈔關卒於任子正揆正撰

李作楹字盈公孝感人父錦篤志正學事繼母以孝聞楹懷宗庚午舉人天性孝友刻勵行義時稱為真孝廉巡方使遵例舉薦授太倉州知州為政

廉明遷建昌同知未幾告歸家居謙和蠲產贍族
人咸義之
子皇詔分巡建昌道

程正揆字端伯號青溪孝感人懷宗辛未進士選
庶常授編修纂六朝章奏充經筵講官歷行人司
正尚寶卿順治甲午補光祿寺丞陞少卿典試山
西得人稱盛累官工部右侍郎丙申督修

乾清宮告成

賜表裏名馬以繼祖母憂去歸老林下建祠睦族里黨

皆稱其厚尤工書畫得者珍襲之

程正撰字異三孝感諸生少孤事庶母極誠敬衣食服御必躬親與兄正揆友愛尤篤宗族子弟秀而貧者延師教之濟其婚葬嘗被盜捕者獲之有遠商攜千金誤與盜同寓捕人利其貲欲誣以盜撰白於官乃得釋庄有吉地友人願厚價為值撰曰地果吉在爾猶在我也竟授之他如賑饑周困施藥活人善行難更僕數

嚴瑄字崙玉孝感人事親色養備至順治壬辰歲
饑設賑活數萬人城東瀕河無梁捐千金築隄建
橋且置亭暑則設茗以飲行者施棺掩骼歲以為
常以子正矩貴封戶部左侍郎

嚴正矩字方公孝感人懷宗癸未進士順治初授
嘉禾司理判決明允捐俸糴粟全活饑民奏最陞
杭州知府禁暴安良保全屬邑士民戴之遷浙江
提學公慎得人尋陞山西叅議以撫响寇金光彩

功

世祖賜蟒服擢廣東按察使守正不阿僚屬肅然晉太常卿歷戶部左侍郎致仕歸年七十二卒

程正言孝感人少孤以孝聞讀書過目輒不忘其弟少歿於難或陰利其產冒以他姓子言怡然撫之後竟天死或益落拓言懼傷其意終身親愛無間有故人子無歸訪給田宅人咸義之孫光鉅官
檢討

黃漢

詳孝子志

魯鑑字永長伯溶孫懷宗甲戌進士以縣令改應
天教授課士有法遷助教晉禮部員外郎釐正藩
體及棘闈諸弊除雲南督學端士習正文體有沙
姓土司作亂單騎諭散之保全甚衆陞太僕卿後
歸卒

黃文旦字敬渝孝感人十歲能文明懷宗丙子舉
於鄉博學篤行慷慨有大志時比之陳同甫嘗客

江右值金聲桓作亂欲官之旦不從夜半踰城而遁晚歲家益貧讀書自樂子懌惟皆有文名

丁之鴻字漸齋孝感人懷宗壬午舉人性孝友急難拯困不辭險遠居恒究心正學躬行實踐尤樂誘掖後進學者每多資之

屠宇鎮孝感人事繼母以孝聞撫異母弟曲盡友愛既析箸第產落復以已業分給之族黨不能婚葬者捐資以助修橋梁施衣食鄉里賴之

彭大壽字松友號魯岡孝感貢生幼端謹及長究
心正學博採先儒語錄參考經傳寒暑註釋不輟
又輯朱子家禮與邱濬所裁定者斟酌時宜取可
通行曰通禮嘗館於雲夢遂家焉遠近問業者踵
至當事欲見之以老辭年七十九卒無子門人為
卜葬建祠置墓田

熊祚延字祁公孝感諸生力學敦行居家以孝友
著聞性慷慨好施予里中貧不能婚葬者鬻產以

助明季流寇蔓延為讎所劫不屈而死以子賜履
貴贈大學士

江浩漢陽人幼失怙事母以孝稱有汪姓寄金三
百遠出十餘年始歸仍以原封付之人貸其資弗
能償輒焚券不問明季荒歉捐資施粥日食千餘
人以子殷道貴

誥封奉政大夫

魯大儒字翼魯孝感諸生幼穎悟力學能文授徒

江漢學士熊伯龍出其門兄弟六人儒居季孝友篤至居恒以忠孝訓子孫修祠祀睦宗族周卹貧乏不吝推解晚年精通素問施藥活人卒年八十有六以子邦獻貴贈榮祿大夫

王試字舉公孝感人七歲失怙事母曲盡孝養甘貧好學交接不苟流寇亂昆弟族人皆逃散試售產為資徧訪得胞弟四堂兄一以歸終身不忍分析子孫遵其志同居凡四世

程大臯孝感歲貢性孝友敦宗族族子志仁流落
臯為治產授室其軫恤孤嫠多類此

池國鼎孝感人八歲值寇亂其父他去祖母王年
八十不能行家人悉奔散鼎獨依王不去賊至以
身障王刼以及傷首卒不為動賊義而舍之後由
明經授蒲城令聞母喪哀毀卒

屠應守字孰大孝感人幼英敏七歲能屬文順治
丙戌舉於鄉授五河令邑近河南土宜麥歲苦夏

澇為文禱城隍水患遂止癸卯鳳屬蝗獨不入邑境邑人尸祝之卒年七十五孫沂進士歷官浙江巡撫

江殷道字九同順治戊戌進士除高州府推官陞蘇州督糧同知以卓異陞九江知府晉分巡饒南九江道籌策轉運兵餉無匱辛亥歲大饑捐資賑粥蠲屯糧省民船修學課士保障潯南多善政未幾卒子繁藻邑義俱登仕籍

姚締虞字歷升黃陂人順治己亥進士初任成都府推官讞獄平允辨冤抑數百家改令陝西安化捐俸代民輸逋賦擢禮科給事戊午典試江西還奏請蠲逋賦二百萬有奇轉工科給事因地震請開言官風聞之禁

命宣付史館歷左僉都御史巡撫四川請免運楠木及白蠟諸雜稅禁絕苞苴屬吏莫不凜然卒於官

諭祭葬

武之亨孝感人順治辛丑進士初令陝西鳳翔縣
值兵燹後民多流亡加意招集給牛種免荒糧邑
人德之陞慶陽府同知土賊嘯聚率衆搗其巢殲
其渠魁已就平而官兵至仍欲進勦且指百姓之
結砦者曰此皆賊也亨固爭之相持四日奉檄撤
兵保全甚衆晉嚴州知府歷陝西學道

程大用孝感貢生兄卒事嫂傳如母終其身不少
懈康熙己未庚申間歲連歉大用盡出所積以贍

鄉里

湖廣通志卷四十七

欽定四庫全書

湖廣通志卷四十八

鄉賢志

黃州府

宋吳瑛宋史列傳字德仁蘄州人父遵路博學強記
議論英偉累官龍圖學士瑛補太廟齋郎仕至虞部
員外郎告歸臨溪築室種花飲酒超然塵俗之外嘗
有盜入室覺而不言及取被乃曰他物惟所欲夜正

寒幸舍吾被後召為吏部郎中就知蘄州皆不起

余玠宋史列傳字義夫廣濟人家貧落魄喜功名少
為白鹿洞諸生以殺人亡命走襄淮作長短句謁趙
葵葵壯之留幕中淳祐元年授四川宣諭使上從容
慰遣玠亦自許當手挈全蜀以還本朝尋授四川安
撫制置使大更弊政遴選守宰築招賢館因得冉氏
兄弟璉璞策徙合州城於釣魚山屯兵聚糧為必守
計乃移金戎於大獲以護蜀口移沔戎於青居移興

戎於釣魚共備內水移利戎於雲頂以備外水皆因
土為壘氣勢聯絡大開屯田蜀以富實初都統王夔
不法玠至夔率所部迎謁班聲如雷人皆失色而玠
自若夔驚曰儒者乃有此人玠夜召夔計事遂斬之
戎州帥欲舉姚世安為代玠不許丞相謝方叔右安
誣玠失戎心召還鬱鬱不自安一日暴卒蜀人悲慕
子師忠歷大理寺丞為賈似道所殺

潘大臨

詳文苑志

元余闕

詳忠臣志

周古象

詳孝子志

吳大中

詳孝子志

吳應澍

詳義士志

明康茂才分省人物考字壽卿蘄州人元末寇陷蘄
州才結義旅捍禦尋從明太祖渡江上欲速陳友諒
來寇以分其力密諭茂才誘致之友諒敗走嗣從破
蘄黃戰鄱陽湖圍武昌收湖南伐吳逼蘄州從征齊

魯關隴節制太原再征漢中所在有功軍中疾卒封
蘄國公謚武毅

吳琳分省人物考字朝陽應澍子性純慤力於問學
洪武中召為國子博士歷兵部尚書上以琳經學優
深命與宋濂同典京試未幾改吏部量材授官號稱
得人致仕歸

詹同三楚文獻錄字同文舊名書婺源人元至正中
以明經授郴州路學正避亂黃州因家焉明太祖下

武昌徧訪耆舊詢用兵之策同以兵不貴多而貴精
七字為對上嘉納之擢為起居注易今名已而奉上
訪求古書籍藏之秘府以資覽閱一以孔子為宗又
偕十人分行十道旁求山林隱逸之堪備顧問者時
劉基疏請加禮大臣忤上意同因取戴記及賈誼疏
以進上為默喻陞翰林學士承旨兼吏部尚書與禮部
尚書陶凱作宴享九奏樂章曰本太和曰仰大明曰
民物生曰品物亨曰御六龍曰泰階平曰君德成曰

聖道成曰樂清寧上以協律善之其餘律法禮儀無不屬同釐定焉後以老乞歸子徽另傳

徐麟楚紀廣濟人洪武初授宣武衛鎮撫歷河南府同知時降臣宋玉集散卒謀夜叛以刺漏為期麟廉知之戒司漏者故遲滯寇疑不發黎明遣邏卒盡獲之以功陞秩賜金帛後調蘄州歷水道房三州俱有政聲

馮思齊蘄州人洪武初以貢入太學上幸學見其儀

度現偉遂授御史初為諸生時與百戶黎暄有隙及
按江西暄誣繫九江獄中齊平心直之後以言事激
切謫雲南推官尋召還舊通志

吳山分省人物考字仲安麻城人洪武初舉明經任
合州學正善教士擢知內江以廉稱尋丁艱去補知
青城至石首卒山博學多聞尤精於春秋鄒來學輩
皆出其門

劉從政分省人物考字恭明麻城人洪武癸酉鄉舉

第一登甲戌進士拜監察御史謇諤抗直彈劾無所
避歷河南山西叅議皆清慎綽著能聲卒於官

劉廣

詳忠臣志

王燾

詳義士志

張根字伯源廣濟人洪武中以歲貢為順昌博士累
陞左春坊司諫永樂間轉太子少傅侍皇孫講讀仁
宗即位諭諸臣曰張根誠實可用然老矣宜優逸之
遂以本官致仕歸

舊通志

王聰

詳忠臣志

蕭昇分省人物考字彥高黃岡人永樂丙戌進士拜
監察御史九載上疏省親文皇命給道里費賜勅褒
之中允王愷贈之文稱其禮以律身明以折獄皂囊
曉進臺閣生風白簡夕飛奸回落膽其見重朝署如
此

張璘楚紀字文玉黃岡人永樂中進士歷官山東叅
政宣德間調福建考最陞應天府尹廉潔幹濟不屈

於中貴卒於官

王佐楚紀廣濟監生永樂間同知徽州府有惠政遷
守饒州廉靜寡欲以德導民後免歸僚屬贐以金不
受人益重之因立却金亭於江潁

呂鏞

詳忠臣志

董應軫字宗南麻城人宣德壬子鄉舉第一授鄭州
學博擢福建提學僉事會廣寇亂舉朝以經濟推應
軫陞參議平蠻有功致仕歸

舊通志

鄒來學分省人物考字時敏麻城人宣德癸丑進士授戶部主事督餉陝西規畫有條理陞員外郎從王驥征麓川來學督兵當前鋒出奇制勝降附甚衆功上晉郎中轉通政司叅議督永平山海兵儲正統土木之變擢僉都御史提督軍務申嚴號令簡練部伍往來要害之處躬親相度因言京師四塞之地宜分遣文武大臣勇智者選在京士馬分守各關隘振揚聲威首尾相應廷臣躋之景泰癸酉陞副都御史明

年巡撫南畿疏言蘇松之民疲困已極請留輸京米三十萬石備賑上從之於是發倉廩賑飢窮勸農桑修水利又謂糧莠不薅則嘉禾不遂乃察官吏之奸貪大家之暴橫者悉繩以法又建議謂蘇松等郡之糧往年俱軍兌輸京頃因調軍征守令民自輸遂至役民十五萬盤費之資浮於正糧民所以重困也請仍復軍運軍用其力民資以財兩適其便時善其議以勞邁疾卒諭祭葬孫騏成化進士刑科給事中

耿介稱

張本端

詳孝子志

程瑩羅田人以吏員擢禮部郎中知瓊州少喪父事

母盡孝繪思親圖朝夕奉祀如生又置義田供祖祭

在瓊成就丘濬為名相惠政多端瓊人立祠以祀

舊通志

志

劉訓分省人物考字忠言麻城人正統己未進士知

金壇縣有惠政性儉素治蔬圃以自給拜監察御史

廉直有風裁冢宰王翱特疏薦其治行為天下第一
陞山西叅政卒子璉另傳

周鑑姓譜字以人麻城人正統乙丑進士授監察御史出按江西大學士陳循子所為不法鑑置大辟陳切齒伺無所得乃諷部遣雲南副使九年不調鑑汰貪墨理誣枉開寶泉壩溉田數萬頃陞山東按察司乞歸

潘文浩分省人物考黃梅人正統間由貢生令廣西

灌陽薄歛省役有虎噬人為文禱城隍越三日虎伏
死廟門毛鞞若有筭杖痕嶺獠奸黠素為民患不可
制乃以恩誘其黨縛之降由是疆場寧謐在任十有
五年擢梧州知府

魯永清字本端蘄水人成化辛丑進士為大理評事斷
獄不爽出知成都府遇旱糴粟賑濟乃創置倉廩廣
儲積明年又飢民用不匱安縣賊烏集滿萬清往諭
皆散去又設釜於公門外令訟者各就爨輒斷輒得

歸有負不解擔之謠

舊通志

李文祥分省人物考字天瑞麻城人成化丁未進士
孝宗即位上疏請裁抑中貴萬安票旨謫陝西咸寧
丞數月擢職方司主事會中書舍人吉人言事下獄
祥復被媒孽竄興隆衛經歷立均差法招寨長申罷
塲禁久而安之尋以齋表入覲兩上疏告歸不許即
南還省母至商城曲河冰隕陷馬先是萬安重祥才
名欲引附已使人延款屬題畫鴈有春來風雨尋常

事莫把天恩當已恩之句安故銜之

華巒

詳文苑志

王思旻黃岡人有幹才倖泰州泰故多牧地孳馬民
間後苦水患旻為奏罷三之二每霖雨懇禱輒應嘗
請部使者蠲租六萬餘石挽州哀訴不聽以身投水
使者大驚具奏獲允秩滿當去民乞留遷本州同知
後歸老於家

舊通志

劉璲分省人物考字士約訓子弘治庚戌進士令豐

城愷悌果斷興學育才邑好淫祀首毀之以正民俗
自守捐介不私一錢徵歛有方奸猾屏迹述職為江
右第一

周廷徵分省人物考字公賢麻城人弘治己酉舉人
以教諭擢御史按陝西時安化王寘鐸反廷徵調榆
林副總兵遊時源等分布要害令楊英為書密達仇
鉞擒寘鐸並首惡何錦等械送京師朝廷遣都御史
楊一清太監張永總兵始至永以功不由己乃追還

寘鐸別自報捷又盡奪寧夏將士功與諸貴倖紀功
給事中郝夔懼而自盡寧夏幾至再變賴廷徵威信
素孚又為撫定而白其功於朝尋陞九江兵備副使
會流賊劉六等欲浮江南窺廷徵晝夜籌畫號令嚴
明賊覘知有備遂遁去以勞瘁卒於官

曾大有分省人物考字世亨麻城人弘治癸丑進士
授知縣徵拜監察御史直聲震臺端以忤逆瑾除名
瑾敗起擢知府累陟江西布政使

張易宗字祖義廣濟人弘治乙卯鄉舉任聊城諭訓
士多所成就擢判瑞州有解餉四人私拆印封府欲
致之死易宗爭之不能得因閉閣謝事適雨臺獎易
宗廉使者至府乃釋焉隨陞雲南鹽井提舉致仕子
二頌有孝行價年十九舉于鄉任國子學正

王麟字體仁黃岡人弘治己未進士授封丘令勸農
桑鋤強梗一境大治嘗途中見百餘人舉大木為邪
許歌有蒼頭乘馬鞭之問知為太宰馬公治宅麟執

蒼頭撻之因切責太宰子比入覲天下計吏庭謁太宰太宰忽起席曰誰為封丘令賢哉愛其民因下揖時兩賢之

張思齊字希賢蘄州人弘治乙丑進士令四會水患洊臻民聚為盜齊設法築隄遂成膏壤民阜盜息遷知亳州除白蓮教陞四川僉事疏治麻衣河民便之尋遷副使備兵建昌勦雅州徼苗為亂者鎮守中貴人欲攘其功誣奏齊混殺良民逮至京事白改霸州

有民訴中官奪產齊議歸產於民沒入中官家產上其狀部使者不報遂投劾歸復起瓊州兵備累官布政使

陳大中字時甫蘄州人正德戊辰進士任南戶部主事積羨金還公帑司徒胡某曰此足以愧既往風將來矣擢慶遠知府故事土官以金銀器物為贄中拒不受削平藍賊以通商旅擢轉運使尋致仕

以上舊志

通志

劉天和分省人物考字養和麻城人正德戊辰進士授主事改監察御史出按陝西忤中貴廖堂被逮民哭送者萬人謫金壇縣丞後起湖州知府多惠政屢擢都御史督甘肅屯政訪求趙充國金城舊蹟奏當興革者十事田利大興改巡陝西請撤鎮守中官及為民患三十餘事又平大盜並漢中妖賊丁憂歸值黃河南徙以故官總理河道先是都御史盛應期開創昭陽湖糜費罔功和躬負畚鍤疏汴河自朱僊鎮

至沛縣飛雲橋殺其下流又疏泰山七十二泉自鳬
尾諸山達南旺湖濬其上流不三月訖工加工部侍
郎改兵部侍郎總督三邊屢破吉囊召為兵部尚書
加少保卒謚莊襄廕孫守有官至大金吾孫守濛以
恩例當廕讓其季父溧又以軍功當廕復讓其弟守
孚後以病夭卒

邢寰分省人物考字伯宇黃梅人正德戊辰進士上
弭盜議稱旨超擢刑科給事中尋轉禮科都給事以

犯顏諫諍為已任上額之呼曰酸子禁中有所為輒問近侍曰邢酸子得無知乎時車駕將遠狩蒙拜伏闕下遮阻乃從厚載門出以忤中貴謫廣德州判官調太平郡貳陞南昌知府恤殍興賢剔蠹振滯卒於官

賈啟分省人物考字啟之黃岡人正德辛未進士授涇縣知縣拜監察御史擢光祿少卿尋謫徽州推官累遷都御史巡撫延綏啟多才藝慷慨談邊事甚覈

所至有治聲及致政家居恬約不殊布素鄉人稱為
篤行君子

曹珪字廷獻黃岡人正德辛未進士授桐廬知縣以
才調海寧召拜御史按廣西平徭獍有功按陝西時
武宗遣中官迎指揮韶鳳妻過陝珪遮留疏論之竟
得已歷官有餘俸不置私產悉與異母弟共之著有
南坡奏議

舊通志

石金分省人物考字南仲黃梅人正德辛未進士拜

監察御史按廣西值土官岑猛亂與尚書王守仁同心勦平營立縣治張桂用事臺中諸御史爭附之金獨立不阿與漢陽戴金俱風采凝峻時人目之曰楚有二金臺中錚錚江西副使胡世寧坐發宸濠奸狀逮獄金力辯之世宗用方士邵元節禱祈前星金疏言當節勞保和以兆麟趾不宜要諸鬼神因與喻希禮上言時政俱謫戍久之宥免卒贈光祿少卿

董士毅字惟遠明一統志麻城人正德庚午舉於鄉

授四川南充令一介不取有青菜布衣破敝羸馬之
謠陞守蓬川清操益勵歸時囊無長物正德戊辰大
旱捐穀倩人埋瘞飢殍不下數千

李宗元字東臯蘄水人正德庚午鄉舉除知沈丘縣
時邑初建百事草創元廉以律已嚴以御下葺學宮
蠲逋稅弭盜革奸鉅細畢舉臺檄有不便民者輒封
還之凡六年遂為壯邑治行居河南第一

舊通志

王澄分省人物考字克清羅田人正德甲戌進士令

番禺有政績歷戶部郎中奏復太監王某所奪民產
歲省租役銀一萬三千有奇奉命督淮餉值歲飢捐
俸以賑所至有賢聲卒於官

王廷陳分省人物考字稚欽黃岡人年甫卅日誦數
千言能文章弱冠魁鄉試登正德丁丑進士選翰林
庶吉士補吏科給事中武宗南狩上疏諫阻上怒杖
之謫知裕州以忤監司免歸林居三十餘年日以詩
文自娛著有夢澤集嘉靖中巡撫顧璘疏薦起用不

果而卒

周瑯字光載蘄水人正德庚辰進士補省垣歷都諫
論列抗直出守廬州以清白為僚屬倡遷廣東督學
甄別士類請託一無所徇卒於官著有韻侗集

昌通

志

沙瑞

詳忠臣志

邢纓字文甫黃梅進士初令常熟會邑大水發藏賑
之活數萬人入為御史彈劾不避權貴劉瑾憚之遷

雲南副使卒於官

曾熒字日宣麻城人嘉靖癸未進士知獻縣擢給事中
世宗南狩抗疏止輦廷杖下獄謫靈州幕直聲動一
時累陞福建少叅拜命未就而歸

以上萬通志

劉采分省人物考字汝質麻城人嘉靖己丑進士時
永康當國縉紳附之以采為會試所拔高等特嚮意
采不肯往謁補宿州守至則益自節約一蔬不以厲
民而發奸摘伏人稱神明屬歲飢上吏督課急采請

移帑羨轉糴為民代輸至秋民爭償無逋者還戶
部郎轉四川叅議督理黃冊蜀王遺以厚幣一無所
受晉廣西副使入覲陞廣東右布政秩滿晉副都御
史巡撫山東維時由藩司進巡撫者率致數千金為
政府謝采獨無一縑之遺達空亟問起居而已撫山
東時民苦採礦命下嚴急采疏請緩詞極婉劉獲允
御史某請開膠萊河通海運采調其不便者五御
史不能難事遂寢先是詔近畿撫臣屯兵臨清備入

衛後歲以為常士卒疲苦采疏罷之累遷戶部侍郎
疏請裁諸費不經者南京鎮武營卒亂殺黃侍郎廷
議代者采語家衆曰必我也趣治裝果以采往比至
條畫度支便宜凡運艦至計道里遠邇分定使庾以
省諸餽費戒主計者剔除一切收支弊由是所在轉
輸稱便反側乃安以災異自劾免穆宗立起南京工
部尚書改兵部尚書凡四載乞休歸采歷官四十餘
年清介如一卒年七十四諭祭葬贈太子少保諡端

簡

黃卷分省人物考字景文麻城人嘉靖己丑進士初
官比部出補山西僉憲晉陝西少叅己晉副憲年踰
強仕即解組歸服犢鼻褌躬督田事與奴僕同甘苦
嘗從鄰舍借耒耜鄰人負送卷曰但借足矣豈可復
荒汝工遂自肩還之又嘗以隻雞尊酒候邑侯曰瓦
尊可見還侯笑與之其清樸如此

張明道分省人物考字希程羅田人少有大志不屑

世利發明朱子綱目啟迪後人年五十成嘉靖己丑進士授都察院都事累任江西按察副使別鑒中外政績著聞為一時循良之冠

胡明睿羅田人兄弟孝友庭無間言教授生徒不取其贄尤輕財好施太守顏其堂曰一門友恭

舊通志

胡明庶三楚文獻錄字功甫羅田人嘉靖壬辰進士孝友力學尤精理數嘗取蔡邵皇極律呂二書章分句解或衍為圖其所自叙又揭中與幾希盡蓋二書

之旨書成名曰蔡氏性理二書圖解行於世

蔡分省

人物考

顧問三楚文獻錄字子承蘄州人少即有志聖賢年十六偶疾父母以為憂問曰疾易愈耳政恐以此廢學不至聖賢為大罪大懼也嘉靖壬戌成進士除壽昌令昌俗好溺女下令嚴禁之全活數萬徵為侍御史轉浙江按察僉事蔬食清謹越人呼為茹菜顧公丁內外艱偕弟闕廬墓數年隆慶中起徐州兵備擢

八閩叅政九疏乞骸得報歸歸則講學養道羅洪先嘗曰子承真聖人之徒也年八十有一卒

顧闕三楚文獻錄字子良問之弟方六歲顧焚祝天願為道德性命之學以報劬勞恩弱冠舉於鄉赴禮闈試事竣即歸省道中閱邸報成進士除刑部聞母訃匍匐歸與兄問同廬墓所未幾父卒復與兄廬墓於鉅姆之濱斬有一鄉距城百里而遙舊俗獷悍格捕逋賦中丞直指建議屠滅之闕力言於當道願以

禮化自請偕門下數輩往申以孝弟一鄉咸若於訓服除補儀部郎移南銓部勲司時年僅三十九決策不仕稍遷至閩中憲副予告歸里垂四十七年一日忽召子孫語曰昨夜夢聯云津吏報增三尺水山人歸卧幾重雲是歲當大水吾將逝矣已而果然闕治六經尤精詩易學者私謚為宣靖先生

方民懷字懋元黃安人嘉靖庚子鄉薦凡二十年絕跡公府嘗寓旅舍有女來奔叱之女跪曰父為債

窘故爾急取囊金賙之遣去令林縣五載多惠政監
司臨以非禮遂拂衣去囊無一錢

舊通志

李同春

詳孝子志

史玉明

詳孝子志

范芝分省人物考字德和黃岡人性至孝有雋才好
學洽聞兄及姊子貧不自立推產贍給之嘉靖間除
知定遠甄善除惡招撫流亡捐俸備賑邑稱大治以
母老棄官百姓遮留不得進乃微服遁歸

杜鳴陽字子鳳黃岡人嘉靖癸卯舉人令遂寧江川
俱有惠政故人朱廷相女許聘豪石迨貧且死豪石
背約陽聘為仲子傑婦夜夢朱峩冠絳衣頓首謝曰
感君厚德必有以報其秋傑舉於鄉授長寧令弟坤

四川按察使

舊通志

奚世亮

詳忠臣志

丘岳字南正黃岡人嘉靖丁未進士歷官禮部右侍
郎正直不阿每誠其家不得與公事致仕後兩奉恩

詔存問鴻文淵學典冊多出其手

彭台字公甫黃安人生四歲而孤穎異不羣讀書務根極理要反躬省証籍記日履上題曰天監在茲夢寐少離於道輒竟日不憚嘉靖己酉領鄉薦益孜孜以明道善俗為己任卒年僅二十有九

周思久字柳塘麻城人嘉靖癸丑進士任瓊州守致仕抗志希古品誼卓犖嘗謂門人楊起元曰學必求至聖賢非但欲為好人也建輔仁書院會講工詩律

書法著有石潭集

瞿晟字景明黃梅人嘉靖癸丑進士授戶部山西司郎中計畫軍儲六十晝夜鬚髮盡白得數十條以對因上覈邊儲疏當事忌之左遷廣平知府鑿長渠三百里引水為四閘得田數十萬畝廣平自是豐饒卒於官

以上舊通志

耿定向三楚文獻錄字天臺黃安人三歲時有公卿到門者大父抱定向於膝向問曰有上者否大父曰

獨有聖賢耳向曰兒當為聖賢矣由是潛心理學登
嘉靖丙辰進士授行人遷御史疏列太宰吳鵬六事
語侵嚴嵩嵩遣人偵向甚急向畧不動出按甘肅
尋改南中督學開崇正書院以明道彰教為己任晉
大理丞與高棋忤謫判橫州高敗晉都察院協理院
事以內艱歸起撫八閩會詔下方田法向募廣興圖
式列區揭之後屏山硯水涯之間咸若目覩又手條
八法布之不數月報竣廣寇林道乾訐海上向計糜

東埔約暹羅等討擒之丁外艱起復為都御史晉戶部尚書總督倉場九疏請罷予告歸嘗謂學以悟入以修証居家凡七年一日整衣冠危坐中寢與門下士論學頃入如假寐者而逝年七十有三詔予祭葬贈太子少保諡恭簡

李時珍字瀕湖蘄州諸生精岐黃術楚王薦於朝授太醫院判以子建中貴封文林郎珍博洽羣書著述甚多其本草綱目書考九百家稿凡三易子建元上

之朝勅禮部刊行王世貞董其昌為之序建中鄉魁
歷永昌府同知建木贈憲副孫樹初另傳

張步雲字子龍廣濟人嘉靖戊午鄉薦任學正遷知
太平府有土官繫獄論死其姪賄謀承襲誣其子非
酉出雲卻其賂刺血以驗由是忤監司意罷歸會長
隄兩決五縣為魚雲時年八十四為書數萬言控兩
臺各捐金修築至今賴之

以上舊志

王廷瞻三楚文獻錄字稚表黃岡人嘉靖己未進士

除淮安理官理官從侍御史按獄率以剋覈立威瞻
獨持平筭不易人入為監察御史按覈畿輔屯田勦
戚中貴侵牟度匿不可問疏請杜冒濫穆宗在裕邸
以閒田相易不許也萬厯五年遷右僉都御史巡撫
四川蜀常用兵都蠻後歲比不登物力耗屈瞻至循
行郡邑問民疾苦緩征薄賦民以還定建昌松潘番
蠻入寇瞻潛師壓境擒其渠魁諸迫脅黨與貫不問
於是諸蠻皆來降願易姓為編戶受田牧事遷右副

都督撫南贛歷兩京戶部左右侍郎督倉場倉場以
邊費絀於故額強半瞻酌盈縮量入為出時寶應諸
湖水為患溺沒糧艘朝議以瞻習淮事加右都御史
督河漕撫江北諸郡瞻因條列謂宜度水脈緩急地
勢高下人力難易乃於石隄東濬月河建五閘以避
湖險所費較初估省十之五上嘉其功遷戶部尚書
贈金幣移南刑部乞歸卒贈太子少保

李畿嗣三楚文獻錄字民欽蘄水人嘉靖壬戌進士

除廣信推官庇平民忤權相為營繕主事督乾清宮
工世宗親賜食卒為嚴嵩中傷左遷漳州同知數平
海寇尋歷南刑兵部郎出知惠州先是沙田陸梁人
民大散嗣勤招徠縱反間擒賊首流移盡復時嶺南
有事羅旁羅與肇慶相接延袤數千里剽掠不可制
當事疏嗣調守嗣設方畧大破之盡平羅旁東西山
升瀧水為直隸羅定州置東安西寧二縣隸馬捷聞
遷監軍副使

李植字良材黃岡人嘉靖辛酉鄉薦除萬縣令善治
疑獄有亡賴子殺一家七人而匿大索久不獲禱於
神得其貌寤而跡之俄就縛有僧支解人隱其屍展
轉二十年不決植從容諭僧乃具言尸所卒伏辜五
載考最徵拜御史疏請省壽陵費上嘉納之後以抗
直出為福建僉事

耿定力字子健黃安人隆慶辛未進士授工部主事
出守成都遷按察司副使督閩學首錄蔡文莊陳布

衣後裔以示風向累遷南僉都御史督操江疏言權使罔利藪奸已復上疏極言中使之害累官南兵部右侍郎卒贈尚書賜祭葬生平學問以求仁為宗以與人為善為體真修實詣超然自得與仲凡定理輩講學不倦

李孟春字愛池蘄州人隆慶丁卯鄉舉授西平令官歲清肅歲早鬻產佐賑不忍開徵撫按劾之民泣控願完節年逋欠當事未信及查數果全完歎曰有牧

民若此者乎悔其疏已發亟為雪救遷順慶同知尋

遷刑部主事致仕歸

以上舊通志

吳良吉三楚文獻錄字石梁黃岡人年少補諸生有聲篤信好古日以講學為事督學胡廬山倡學楚中吉往謁待以殊禮胡偶爬其頂吉曰不敬胡曰偶然耳非不敬也吉曰若至尊之前此手肯去否胡奮然曰侯益特重之每請見有所益即拜謝一日偶謁曰貴鄉有一命案昨以二人抵吉問狀益曰以石擊死

吉曰兩人扛石擊之乎一人拋石擊之乎孟凜然遂
解一人其人來謝吉叱之耿定向弟兄聞其名過訪
會雨漲不能去日以麥飯鮮鰕為供客具耿嘗戲謂
人曰吾生平為吳石梁先生麥飯淡鰕所苦然不敢
不飽也

吳自守字介夫廣濟人學邃於易顧日岩建讀易菴
延之自是稱易菴先生從遊日衆設講堂泉湖側以
待四方學者

陳王道字仁輔廣濟舉人嘗欲仿行范仲淹義田朱子社倉法是時廣濟歲苦漕運張居正為相道與劉梅沙請改折色獲允其半後人賴之

以上舊通志

韓紳

詳孝子志

胡海字光伯廣濟人以諸生就武試成萬曆癸丑進士歷薊州副將歸凡俸餘所蓄悉付弟浩兄弟同居六十餘年未嘗疾言遽色鄉人龔氏兄弟爭田構訟海聞之兄弟對泣龔氏感而相讓浩子一璉由拔貢

官至廣西布政使贈浩奉直大夫

萬通志

瞿九思三楚文獻錄字睿夫黃梅人少有異稟入小學即究綜六經五緯旁括百家十五作定志論學書娓娓四萬餘言歷主白鹿濂溪嶽麓石鼓諸書院皆論學有發明萬厯癸酉舉於鄉為梅貪令所誣奪孝廉發口外長子甲從甲時年十四過京師上書宰相張居正訟父寃居正召九思見問對甚合曰瞿真寃且才也於是九思雖發輒得入京具疏辨奉旨勘

擬杖還里歸則益進於學閉關不出中州東坡嵩陽
兩書院粵之濂溪書院咸堅請論學作中庸口授中
庸位育圖中庸運卦益有發明觀察馮慕岡迎主化
民成俗倣周禮號鄉師因撰土俗章程盛朝倣古編
聲樂編實用編童叟歌習之嗣更先後作古樂測孔
廟禮樂考仁統洪範衍義至聖榮哀考六經以俟錄
歷正諸書兩堂疏薦徵授翰林待詔不起俞旨歲給
米六十石資待詔著述乃著明詩擬武功錄遣少子

罕並樂章獻闕下卒年七十有一龍坪嘗為九思創
書社額曰江漢書院官置學田子二甲成孝廉早卒
罕亦伏闕白父寃人稱瞿氏雙孝子

李際春三楚文獻錄字和元蘄州人生而蚤慧執經
於仲兄思池終身不敢序雁行萬厯丁丑成進士宰
歸安有富監者淫人妻而焚其夫姻連要津殆不可
問春卒窮治之抵於理時詔量郡邑田豪右隱占獨
累窮民春按籍履畝未嘗少徇分試浙闈當路以愛

子越籍見託峻拒其請移戶曹督餉蘭州一幕官解
數千緡中為盜刦春廉其實以他羨補之幕得不死
遷涼州叅議地方苦徭馬力陳不便尋督廣西學正
以去任風影事見中拂衣歸募數千金築隄長二十
餘里障郡之赤東湖水患時以兩臺薦擢四川叅議
定徇賊之亂陞汝南副使平礦盜沒心秤歲飢拮据
荒政全活數千萬以勞瘁卒于官春天性孝友兄弟
五人相誓世世無析箸男女千指怡然同爨嘗訓其

子樸標挺扶等曰吾居鄉居官惟以鬼神二字時時
在念汝輩宜用此心腸作人迎養長女成其節子挺
孫本晟俱進士

王陞三楚文獻錄字于勳黃岡人萬厯己卯鄉薦選
山東肥縣踰遷蜀威遠令威俗悍羣不逞輒敢訟長
吏陞曰無他過長吏或貪耳示以廉遂馴服暇且具
餅食每單騎至窮鄉下里勸民耕轉泗州守舟東下
山谷老稚各負豆一二斗稽首上陞辭不得人受一

升泗以水不治熙祖陵為水浸嚙陞具疏求開高家
堰以疏水源上遣科臣視河竟以間支流報陞具揭
忤諸當道意遂以周家橋大工責陞獨任之視畚鍤
雜土傭坐臥風雪役竣水稍殺又泗某奉祀者倚陵
莊奪民田陞按冊釐核不少假遷渝州佐督餉平播
改貳遵義移上谷龍門介不可犯老而彌篤嗣遷滇
鎮南遂拂衣歸歸則講學正宗會館其學以天理為
安倡修問津書院歷官去皆塑像祀之

王大謨字惟允廣濟人萬厯庚辰進士令太湖甫八月御史臺按視才之薦為比部郎適中官父錦衣張某卒孽子爭財自殺下部鞠所由尚書密屬謨謨至其家慰弔引見其稚子倉皇訊之得實歸具詞平乞錦衣嗣子得全上與中官大悅熱審中官例至大理寺署南面坐尚書以下皆侍謨曰春秋尊王人而奄尹不列朝署使者當下中官怒謨疏論大臣者陛下之子孫中官者陛下之臧獲子孫舉事而令臧獲

視之又偃然俯而臨之謂天下後世何疏留中歷員
外郎督學雲南捐俸構玉華書院聚諸生講業遷廣
西左叅議以母老乞歸養薄田數畝外無餘羨焉

石崑玉字楚陽黃梅人萬厯庚辰進士特授蘇州
知府執法不阿領鹺使以廉潔稱節鉞雲中甚得撫
綏法奏疏詩文冠一時子有恒有信孫確礪礪礪皆
著名確令丹徒調宜興皆有善政礪以保城功鄉人
祀之

張星字聚薇蘄州人萬厯壬午舉人令如皋邑有沙
田歲苦水漲壓沒星捐俸濬河導水入海民以有秋
又鹽塲舊例每一撤丈費商人數千金星單騎裹糧
而商不擾通州有巨蠹交通勢族官民畏之獨毅然
請撫按鋤治中官騷擾滋害星正色不避遷歸德府同
知致仕

以上舊通志

梅國正三楚文獻錄字克生麻城人萬厯癸未進士
令固安鳴琴畿輔七城自肅以政最入為御史會寧

夏鎮將哮拜子承恩等據城叛命正監李如松軍征之破其外援引水灌城城中食盡援絕有願獻南城者總兵牛秉忠年七十賈勇先登正援梯大呼曰老將軍登城矣諸將昌怯乃畢登南城下賊復據守大城正縱反間許相圖自效賊遂內亂殺劉東賜許朝倖承恩以獻哮拜自焚死以功陞大理少卿廕一子錦衣百戶後晉僉都御史巡撫大同又五年陞兵部右侍郎總督三鎮以父喪歸遂卒

樊玉衡三楚文獻錄字欽之黃岡人萬厯癸未進士授廣信推官召拜御史性強直敢言首請皇長子出閣講學再疏三王不宜並封譏切中禁謫判無為州稍遷全椒令時以國本未建為憂衡齋三日草疏極言戚畹憤摘疏中語泣懇上前旨一夕三四擬事且不測賴南溪相密揭主上御極未嘗殺諫臣廷臣亦亟請下衡疏以正所坐上乃取疏焚之而衡之者卒假他案遣戍雷州長子鼎遇伏闕請贖父罪不允光

宗立次子維城以鹽官令得覃恩引例乞傳已封貤父職由是在雷二十四年始得旨賜還補南刑部主事辭不赴惟陳時政十款詔廢之以太常少卿致仕維城另傳

夏忠字孺和蘄州人萬厯辛卯舉人令淮安桃源時苦海寇忠修葺城堡嚴保甲荏苒無警調宛鄧革羨餘不取鄧有大辟繫獄者百餘出脫九十二人梓有

鳴冤錄陞思明府同知致仕

舊通志

樊玉衡三楚文獻錄字元之衡之弟萬厯乙未進士
除商城令為治舉要領罷猾保及馬快按誅大豪餘
蠹不敢犯中璫採礦至商衡具言無礦與璫抗明日
薄款璫以酒璫執衡手曰好手衡曰無他好只是不
捉民間錢耳因導璫入險為文告山靈曰有礦耶無
礦耶何不吐符陳貢以抒天子憂天子視民如傷如
令與璫藉口括金以負天子願神奪其魄殞其命璫
氣奪怏怏去調崑山折織造中璫亦如商時報嚴擬

受銓部聞父病即馳歸侍父衣不解帶者數月勞苦成疾卒商崑民祠之歲時以蔬菽淪菹薦曰在任時所嘗御不敢忘也後令治或無狀輒入夢譴告令商請冒昧焉懷宗初敕建祠謚孝介

舒其志字元渚廣濟人父賢事親至孝年四十夢神贈雙壁始有子長其心次即志也登萬厯乙未會魁授行人擢四川督學江西按察使淮王欲立寵娼子而錮世子於秘室娼子左右皆羣盜出沒彭蠡間志

初弗問忽夜半出片紙捕其黨置之法面責王王立
出世子而殺娼子稅璫李道於湖口鳳凰磯為暴志
陰製飛舸密令守戎夜聚蘆葦圍磯縱火璫怖因乘
機縛其魁送九江獄衆校爭投水志單騎馳至故為
之畫曰若住此吾知不免惟束裝宵遁耳璫果遁去
已得請旨革除居民立祠祀之遷江西布政歸卒子
簡默皆有名

吳化字敦之黃安人萬厯乙未進士授鎮江推官數

斷疑獄出人意表民有壓死者誣為諸生某撲殺化
案之曰撲人者右其手理宜橫今縱而左非撲也民
乃服遠近神之累官戶部主事

李長庚字孟白麻城人萬厯乙未進士由戶部主事
累遷順天府尹京畿荒旱疏請平糶賑飢免稅皆朝
上夕可民賴以生巡撫山東與民休息遷戶部侍郎
督餉天津復海運倉廩充實晉刑工二部尚書魏璫
以為楊左黨削籍懷宗時起大司農家宰上褒以勤

勞清慎後與柄政者意不合放歸

以上舊通志

張邦翼

詳忠臣志

穆天顏字象懸黃岡人萬厯丙戌俱亞魁授番禺令
舉最拜福建道御史疏覈稅監及諸權貴凡所建白
婉曲引諭時疏多留中而顏奏輒下部議行歷巡按
廣西丁內艱歸里布衣徒步不置產業初顏父守文
司鐸四川卒於官顏方少與兄扶櫬歸逆旅投宿不
納會大雷雨昏黑兄弟哀號逐電光行峻嶺中附容

舟資且罄相與朝夕哭客感其苦孝乃厚贍焉既貴
倍酬之

官應震字暘谷蘄水人萬厯戊戌進士由縣令入戶
垣屢疏人才消長東宮國本禮儀奢儉宦監朋黨諸
大事請罷額外貢稅並取金花銀還太倉以濟軍食
前後二百餘疏上嘗語左右此人敢言任怨御書姓
名於屏時議增賦震力爭減楚賦三十三萬光宗即
位稍遷太常少卿尋乞歸

於倫字大常黃岡人萬厯辛丑進士官御史以不附魏璫告歸養子斯行舉於鄉獻賊破團風洲被執不屈死

吳亮嗣字明仲廣濟人萬厯甲辰進士以南充令治最擢兵科給事受事五月四上疏而三得報神宗朝異數也嗣感激益請勵精圖治節冗費裁稅璫時滿朝薦劉光復皆因事繫詔獄嗣請釋之又疏理熊廷弼之誣及董其昌張濤等人材可惜因張差事請申

飭禁衛又請飭京營武備條戰守事宜天啟初遷太常少卿三年罷歸弟亮思懷宗時選貢以廷試上疏論大臣徇私請託懷宗下其疏凡三置對侃侃有亮嗣之風

楊王庭字中愚麻城人萬厯己酉舉於鄉授潯陽令江岸北地形窪下民數千聚廬於此時夏流汎溢民將淹沒庭築隄捍之號楊公隄以持正忤礦璫調桃源令尋晉廣信府丞告歸教子孫以文章名戚族之

貧者咸仰給焉

盧堯臣字贊勳黃安人萬厯庚戌進士授益都令邑多貴執臣抗法不撓被中傷謫去久之起濟寧府寧前衛推官致仕子七爾惇巴州守爾恒通判爾悌另傳爾慥舉人孫繩慈松楊令經戌戌進士興化推官俱有聲

以上舊通志

胡士容三楚文獻錄字仁常廣濟人萬厯庚戌進士授長洲令遷嘉定請徵折色省轉輸費鉅萬歷戶部

主事郎中時大司徒抗直諱青諸曹郎獨才容章奏
多屬起草遷山西叅議兵備薊州魏黨崔呈秀薊人
也薦其倡姬弟為材官拂然絕之有奸賍吏捕急投
崔氏第竟取論如法郡邑為魏忠賢立生祠容讓臂
曰門奄采椽而居之人猶有氣乎禁不許遷江西副
使馳傳至山東驛遇忠賢所使中貴人爭馬容憤令
蒼頭擊其從者中貴奔走連鎮撫獄擬贓七千榜掠
無完膚薊及長洲民間之咸輸鏹以代懷宗立乃獲

釋補陝西副使兵備臨洮鞏昌駐蘭州遷叅政駐
甘肅卒贈太常卿子崙以軍功世襲

王欽濂字孟周黃岡人博學多聞萬厯壬子鄉舉令
江西南陵首開六連湖水利澤及數萬戶時寇躡江
南捐俸賑飢練鄉勇增城堞賊不敢窺撫按以守禦
功疏薦第一尋卒於官長子承祐癸酉副榜次子承
啟辛卯舉人孫懋德懋才俱進士

周之馴字無逸黃岡人萬厯癸未進士以計曹督榷

清江浦約已通商督學八閩校閱皆出一手還江右
驛傳道以郵符註誤復補登萊叅議殫瘁邊防因城
工報竣增級賚金戊寅量移濟南分巡副使死於官
贈光祿卿賜祭葬

以上舊通志

李新

詳忠臣志

石有恒

詳忠臣志

李樹初

詳忠臣志

李楷字端甫蘄州人萬厯間襲千戶職授靖州守備

隨劉綎征苗播攀藤越樓關天塹建立奇功加世襲
指揮陞浙江叅將會海賊入犯設奇大破之擢吳淞
副總兵晉貴州總兵歸里居喪廬墓孝友同居及卒
弟棟嗣其爵

舊通志

詹時明三楚文獻錄字爾用黃岡人生而醇樸下帷
發憤日偕所與儔講明性道里人目之曰古人以歲
薦補常德訓日坐堂舍秉鐸無他營一日直指命點
大龍站馬積猾更番相混明嚴核之則請以賂免明

曰吾奉直指命且馬政國大事也阿堵物敢撓令耶
衆慙而退未幾遷江西武寧諭其課諸生學主明理
而旁暢實用曰四科三途豈僅區區咕嗶哉陞筠連
令解組歸談道講藝如故學者尊為冲默先生子謹
之另傳孫大衍大有皆舉人

李挺

詳忠臣志

張金和字汝節廣濟人以拔貢再任廣文遷武平令
始至值小河卒因府胥索賄滯糧聚詬太守和單騎

諭解之徐誅首事藩掾令妾誨淫得吳商金又殺妾
與商和得情誅掾李藩父子殺人郡納賄欲脫之和
寘之法在邑三年政平訟理解組歸年八十六卒孫
仁熙有學行康熙甲子與修通志

金之純字健之廣濟人萬厯乙卯舉人署醴陵諭補
浙川令以治績擢知興安州流賊突至倉皇登城誓
以身殉丁壯皆感激殊死守時久旱夜半雨大注城
壘暴深五尺賊始退一歲中賊薄城者四糧盡且陷

密檄旁郡遊擊唐通為援夜縋敢死士會襲之斬獲甚衆賊去民飢且疫設粥食調醫藥以撫之狀聞擢守漢中會疾卒年四十六踰年寇至民見純絳衣大冠立埤間若泣者遂廟祀焉純篤於友誼江夏吳裕中劾丁紹軾語侵璫矯詔死杖下親故皆竄匿暴屍衢中純獨臨其喪返其櫬於三千里外妻李氏有節操明於大義訓子德嘉成

國朝壬戌會元另傳

以上舊通志

饒京

詳忠臣志

王崇擢字平衡黃岡人三歲失怙奉母李氏盡孝為人長厚謹飭童孺皆親之以子用予貴封檢討孫澤弘復入翰林擢與其配同享大耋澤弘請告終養人以為榮焉

秦如容字介臣黃安人事父孝父卒孝養祖母為諸生貧甚刻苦讀書甲戌成進士選中書舍人念邑人計偕長安無停驂所特倡建會館至今賴之家居置

義塾造就宗黨子弟多盛德事

張鵬翔字拱北黃安諸生博聞嗜學有隱德邑令請
賓鄉飲為書懇辭先是里中有黨人之變翔暨仲子
百程帥眾四百人與各寨討定其亂好事者蔓株不
已翔流涕為言殺降不祥於是多所全活桑梓尤德
之晚講尚書於壁山學者稱壁山先生著有壁山文
集若干卷

以上舊通志

皇清劉子壯字克猷黃岡人弱冠登賢書雄詞健筆自

成一家言其制藝為楚文風之冠有雅量人以
公輔期之己丑成進士

廷對第一人授修撰制策條奏如開

經筵及設滿學滿科諸事皆蒙舉行壬辰分考禮闈未
幾請告歸里性孝友初出嗣從父為置媵生二子
然後歸本生父撫育諸弟姪成立嘗遊吳門有小
吏被誣繫獄白於吏脫之吏鬻愛女得五十金為
獻壯急令取還女獲免官翰林時捐百金贖同鄉

難婦與夫完聚生平善行多類此卒年四十有四
陳天生字植其黃岡人父楚安生母劉俱早逝事
嫡母蕭至孝弱冠補邑庠敦行尚義以清白訓子
孫以長厚式里黨葛巾芒履逍遙遊咏有古隱君
子風卒年六十有二贈通議大夫子五長肇昌另
傳

王躬俊黃岡諸生少事父母以純孝稱兄弟五人
三世同爨立義學延名師訓鄉人子弟成就甚衆

做朱子社倉法倡捐米穀壬辰大旱斗米千錢計
口周給全活不可勝計孔子河有問津書院燬於
兵糾衆捐修置田供春秋祭祀又明末東山未靖
大軍進勦俊糾集鄉勇籌糧餉贊方畧不匝月寇
平當事者議題用力辭不受年八十餘手不釋卷
以疾卒子風采孫全才俱另傳

劉登仕

詳孝子志

張先基字開有廣濟人順治己丑進士授棗強知

縣生母早喪事繼母如所生待異母弟極友愛兄嫂喪遺孤貢金撫育教導得補邑庠親伯叔之嗣基殯葬盡禮置田供祀族黨貧乏者周恤之初至棗強讞大辟獄十餘案活其矜疑十二人鑒拔人材尤有卓識如宋師祁王恤等皆其所得士

湖廣通志卷四十八